

BIBLEWUI CHURCH

(Tangkhul)

By
J.C.Choate

Published by:
World Evangelism Publications
Winona, Mississippi

© Copyright, World Evangelism Publications

This printing - 5,000 copies - 2023 – **Tangkhul**

InDesign Layout: Shane Fisher

Translated by: Chaams Jajo

WhatsApp number: (+91)7578902266

Phone number: (+91)8486481266

Email: hearhim2@gmail.com

Proofreaded by: David Jajo

Websites:

www.worldangelismlibrary.org

www.gospelgazette.com

www.worldangelism.org

www.worldangelismmedia.com

Printed by:

World Evangelism Publications

Winona, MS 38967

**LAIK HI BIBLE CORRESPONDENCE COURSE SADA
SHICHIN KHANGAIYA BINGLI CHITHEIKHAMI.**

Lumashanda lairik hi mathalak eina kakup eina tangda pamilo, kala lairik hi kapa chitharan nawui kathara bible li ngaheolaga pamilu. Lairik hiwui para kachivawui akatangli Khangahan bing zangdalei, chibing chi khangatei lairik akhali para avava wui athishishurda ngahankamilo. Lairik chi mathada hailo kala para avavawui athishurda nana kapi kahai ngahanka-ka bingmang chi chihopaira. Sakhashili para mati phanga shakhawui ngahankaka bing misangpaira kala chi ithumna mathalak eina sakhuilaga nali chihoramilui shitra. Hithada lairik hiwui para bing makuprang laka eina tangda zatvashumra. Lairik hiwui para bing tamrumkhavai mayakhami wuivang nali masotmi dalei, lairik hiwui manga eina nawuivang kachungkha tongkakhui kala kankhana ngasarano.

MAIYAN

Ina lairik hi correspondence course akha sada shichin khavai kakapina. Lairik hi kakapi hapta tharada kathum zanghaowa. Haptawui zimiksho akuplamshong (week end) kajida para avava kupsangda Colombo, Shri Lanka wui magazine li sangmiya. Proho wui church li makathei bingwuiwang da rinlaga kakapi lairik ngasahaoda bhaptaphalak kahai apong eina kakapina. Rakhanao para (lesson) bing avava saikora chili kharei para bingwui khamataiyabing teomeikha meikhaimiser haidalei. Kala Khamataiya, theikhangayiia bing (major points) li ngaheolaga khangahanla kha zangdalei.

Ina New Delhi, India li hongvada akapan chitharan para avava chi kazipkhuida lairik asa akha sada namshokka. Chili tuiyur kachungkha eina namshok da shichinna kala arui, aja eina tangdala shichindalei. Naoda Shri Lanka, Singapore, Guatamala, USA kala khangatei yur kachungkhali namshokka. Hangda khalei Yur bing himangli maningla kha okathuili Vareishi panda khalei apam kachivali chihomida shichinna.

Lairik hiwui khamataiya kharin chiya, Biblewui church hi khikhala kaji mibingli chithei khavai kala tammikhavaina. Ina shitsanga kaja nana lairik hi kathara Bible li ngaheo laga kakup eina tangda pasi kaja kala tamsi kaja, Prohowui church akhamanga kala church chi Awui aming ngavaiya kala nakhalatta hi church chiwui mipha akha (member) sangayiia kaji nakhalatta theikhuira. Kha chiwuiwang iwui tui makhuilo. Nakhalatta palu kala thuklak eina machuklu, mashungsaakha khuisanglu kala mamashungsaakha makhuisanglo, chithada nakhalatta mashungkhuikapai apong chimanga.

Lairik hi shichinda ngasotnaobingli Prohowui Church hi khikhala kaji theingasak khavai Vareishinaobingli poli. Lairik hi shichin kapai apong chili mashunglak eina shichinsi kaja hinala Vareiwui ot manga kakhuili kachungkha ngachonra da ina shitsanga.

Naodala lairik hi kachungkha namshokluishit khavai machukdalei kala hiwui manga einala Khristawuiwang mangla kachungkha huikakhui ngasakhavai seiha sali.

J.C. Choate
Winona, Mississippi
January, 2000

TUIZAN

Katam Akha – Churchwui Kakhalat.....	5
Katam Khane – Church Khara.....	9
Katam Kathum – Church Sakaka.....	13
Katam Mati – Churchwui Machut.....	17
Katam Phanga – Churchwui Aming.....	21
katam Tharuk – Churchwui Otsak-khangarum.....	25
Katam Shini– Church li Kazang.....	29
Katam Chishat – Churchwui Khokharum.....	33
Katam Chiko – Churchwui Otngarut	37
Katam Thara – Churchwui Khokkha Kasa.....	42
Katam Tharada Akha – Churchwui Tamkachithei.....	46
Katam Tharada Khani – Churchwui Thotchan.....	50
Katam Tharada Kathum – Ajawui Church.....	55

Kachithei: Lairik hi Bible Correspondence course sada shichin khavai da Colombo, Shri Lanka wui hapta kachidawui weekend Magazine li nam-kashok lairikna.

KATAM AKHA CHURCH WUI KAKHALAT

Biblena church akhawui pongli matuiya kaji chili makhamaya mi malei mara. Kha khipawui church? Church Kachipa? Khi Church? Khangahan bing hi atam chalak eina ngahankamira, kha aruichangva ithum church hi khikhala kaji rida phashokfasa.

Rilak eina Church makhaning bing hi khikhala kaji phakashok eina ngasoda haophok haosa. Bible li kapikahai athishurda Church hi Catholic, Catholic li mamaya mada kaishok kahai bing, kala Jehudi wui dharma, hibing hi maning mana. Shitkasang ngateingarok haida kaingaroklaga khalei church bing (denomination), kala chikatha church avavana ngarumda sakakhui bing (interdenomination) lah awo-ayina khuirakhami ngashanwui athishurda kazat bing chila maningmana. Kala Church hiya longnao kala ashangva kazip khavai shimla maning mana. Hangta kahai hibing hi Church maningakha, Church hi khikhala?

Mi kachung-kachangna Church hi khikhala da matheishingkhuirar mana khiwuivang khala jila athum ‘Church’ kaji tuiyar hiwui kakhalat khikhala da matheimana. Chiwuivang eina Churchwui kharin, khamataiya kala chiwui otngarut khikhala da matheishingkhuirarmana. Kha Biblena ithumwuivang ngahahang eina kala theishingkhuipailak kahai apong eina church hi khikhala kaji hangchitheimi hai dalei. ‘CHURCH’ kaji tuiyar hi Greek tuili ‘EK-KLESIA’ kaji tuiyarwui eina kharana, chiwui kakhalatva ‘Hoshok kahaibing’ Kajina. Chithada sada Church kaji hiya tangkhamang moreipam, okathuiwui khamakhaowui eina hoshokda Vareiwui khalumma naomayarawui wungramli hozangkahaiya athumli kahona (Colossianao 1:13). Church hi manglarin eina Khristawui phasana (spiritual Body of Christ) (1 Corinth-nao 12:27), Church hi Khristawui kahang nganada ali khuisangkahaibing eina sakakhuina (Hebrewnao 5:8,9). Kala chiwuivang eina athumli ana kaja Khristana huimida awui churchli ngarumsangmi (Mark 16:16; Otsak 2:47). Church hi Khristawui thikashurabingwui ashangva kala kazipnada hangpai.

‘Church’ kaji tui hi bible li theishingkhuikapai apong khani eina shichinna, chiya, khareyali, yarui katongkhana bhapta kapai apong eina shichin haiya. Khristawui ningli chi leida ana hithada hanga “*kala ina nali kahangna, na Peter-na kala lunghar hiwui tungli ina iwui church sakara, kala kathiwui pangshapna chili mayuirarmara*” (Matthew 16:18). Hiwui apong eina shichinhaida khalei Bible tui-iza kachungkha leiya. Chiya, church hi okathui apam ngatateidali leisalapai, kha chi Biblewui Church ngasadaleiakha chi Khristna “*ina iwui church sakara*”

da hangkahai Khristana sakaka church china. Kakhaneyali, local akhali khalei shitkasanga bingwui ashangva akhawui pongli khamatui tharanla ‘church’ da shichina. Paokazatta Paulna Romeli leida khalei churchli chithi kakapi chitharan hithada kapida hanga “...*Khristawui Church saikorana nathumli shalam mili*” (Romenao 16:16) hili “Church Saikora” da Paulna church kachungkha khalei thada matuida khalei hi ngakai-ngakak da leidakhalei church (denominational churches) bingwui pongli kahang maning mana kha kha, ram kala tang ngatateidali leida khalei Prohowui Church ashangva (local congregation) wui pongli kahangna.

Bibleli, ‘Corinthli khalei church’, ‘Ephesusli khalei church’, ‘Philippili khalei church’ da kapihaida khalei payanglu kaja saikora chi local church wui apongli kahangna (local sense) (1 Corinthnao 1:2; Ephesianao 1:1; Philipinao 1:1). Mi kachungkha hiwui pongli pangapaya khiwuivang khala jila athumwui ningli Church kaji hi shitkasang ngateingarok kahaiwuivang mamaya ngarokla khalei church bing (denominational churches) chili kahona da khuiya. Kha Bibleli chikatha churchbingwui pongli kapikahai nana kapa masamphang mara. Ithumna tamrumkahai hieina tangdawui alunghili local church kachungkawui pongli nana kapa samphanghaira, kala athum avava chi apam ngateiteidali kala yur-zat ngateiteidawui apamli leidalei salala Prohowui church serra. Kachikatha akhana mamaya khangarok kala kaikhanga-rokwui ningai horhailaga bibleli zangda khalei horzak kahai chi khikhala da phasi kaja Varena ithumli samphangngasak khangai church chi khikhalada ana theira kala samphangra.

Mathameida kala kupmeida church wui kakhalat khikhala da theikhavai bibblena churchwui pongli kathada chitheimi khala kaji phaningungsa.

1. **Khristawui Phasa.** Church hi Khristawui phasana manglarin eina (spiritually), kala Khrista, A khalatta Chiwui akuiana (Ephesianao 5:23). Phasa akhamanga (Ephesianao 4:4), kala Phasa akhamanga kaji chi akhamang kaji church chili kahangna (Colossianao 1:18)

2. **Varewui Shimkhur.** Varetuili kapi kahai athishurda ithumna theipai kaja, Church hi Varewui shimkhurna da (1 Timothy 3:15). Varena Shimkhurwui Avavana kala vareshi ithum hi awui naongarabingna (Galatianao 3:26,27; Ephesianao 1:3).

3. **Varewui Wungram.** Wungram leiakha awunga leiphalunga kala chi Khristana (Phongkhami 17:14). Kachikathana a awungana jiaakha awui wungram leiphalungra, Khristala awunga akha sada awui wungram lei (Otsak 8:12). Vareshi ithumbing hina wungram chiwui ruichumnao bingna kala Kathara Tuingashit hina wungram chiwui ayinna, kala hi churchwui pongli

kahangna (Matthew 16:18,19).

4. **Prohowui Drakha Yamgui.** Khristana drakharongna kala va-reshi ithum avava hina chiwui aphanh avavana (John 15:1-8). Hiwui kakhalat chiya ithum yamkui hili ot sada Prohowuivang athei matheimira kajina.

Church kajiwui pongli hithada meikhaichithei haiya. Hibing hi katha-ratuiwui kahor chili pakhuida machucklu kala nakhalatta theikhuilu. Varena theingasak khangai churchwui zakyui chi nana theikhuiakha nawui asak-avat saikora ngacheida mirin khangacheila samphangra.

Khangahan Bing

Khamashungbing chi circle salu:

1. Bible li Churchwui pongli kapihai. (MA/ MANINGMANA)
2. Church hi Catholicna. (MA/ MANINGMANA)
3. Mi chungkhameina Church hi khikhala da theiya.
(MA/ MANINGMANA)
4. Church kaji hi Bibleli apong akhamang eina shichinna.
(MA/ MANINGMANA)
5. Khristana Awui church bing (church kachungkha) sakarada hanga.
(MA/ MANINGMANA)
6. Phongkhami lairikli Asiali khalei church shine wui pongli kapi kahai chi shitkasang ngatei khangarok church shine (denominational churches shine) wui pongli kapihaida khaleina. (MA/MANING MANA)
7. Church hi Khristawui phasana. (MA/ MANINGMANA)
8. Phasa akhamanga. (MA/MANINGMANA)
9. Khrista hi Churchwui akuiana. (MA/ MANINGMANA)
10. Wungram mararanga. (MA/ MANINGMANA)

Mashungda ngahankalo.

1. Church makhaningbing chi khimamei khala hili kapitalo
2. Church kaji tuihi Greek tuili khi hokhala?
3. Church hi khi ngarumda sakakhui khala?
4. Church kaji tuihi apong khani (two senses) eina shichinna, chi khimamei khala.
5. Khipana khipawui Church sakarada hangkhala?

6. Ana church kayakha sakakhala?
7. Asia wui church shini chi khi church mamei khala?
8. Phasa kayakha khala?
9. Awungabingwui Awunga chi khipakhala?
10. Prohowui drakha yamkuili ithumwui otngarut khikhala?

Azingli mikahai tuikhur bing hi teomeikha meikhailu.

1. Ekklesia.
2. Khristawui Phasa.
3. Varewui Shimkhur.
4. Varewui Wungram.
5. Prohowui Drakha Yamgui.

KATAM KHANI CHURCH KHARA

Church hi thangngayakhawui lung thada khara maningmana. Kha hithada rashokrano da rida machukkazak kahai leiya, khamaranla maranhaiya, kala tuingashitla sahaiya, chithada naolak eina church hi mapungphalak eina sakakana. Bibleli saikora hiwui pongli tharzari eina chithe i haidalei.

Khareyali, Church hi Varewui ningli leihairasai. Paulna Ephesusli leida khalei katharabingli phongmida hithada hanga, “*Ithumwui Proho Jishu Khristawui Vare Kala Avavali ningshisa! Kaja Ithumna Khristali khangarumwuiwang kazingram katha apuk-apaga hili ithumwui tungli manglawui sokhami kachungkha heirormihaira. Okathui masaranglakhala khristali khangashikwui vang Varena ithumli awui ngasakhavai kapangkhu. Chieina ithum awui mangali khamakhao maleila kathara ngasara. Leikashiwui vang khristawui manga eina ithumli Awui nao sakhavai Varena ngaranping kahaina, hi Awui sakhangai ningkachang kharin china. Ithum Awui tekhamate lukhamashanwui vang Vareli sochikatsa, kaja lemnet chi awui khalumma naomayarawui lungli ithumli mihaira*” (Ephesiano 1:3-6). Theilu kaja hi ana Ephesuli khalei churchli kapida kahang tuina, chiya Varena ithumli okathui masaranglakhala kapangkhuihaira kajina. Chiwui kakhalat chiya Okathui hi masaranglakhala Varena awui ningli churchwui pongli machukhaira saya kajina. Chithada sada, rilak eina church hi Awui ningli leihairasai. Varena haokaphokwui eina thuilaka saklak eina hithada rashokrano da Awui ningli machuk kazak kahai ot kaja church chili aja ithumna khikha makhaning thada sasikaja kala sakta makhuiakha hi Vareli ngakaikashi kala makhayakashi otsakna.

Kakhaneyali, Churchwui pongli khamaranla kachungkhashida maranhai. Maran Isaiahna hithada hanga, “*Naoda hithada rashokra kaja Prohowui shimwui phungrei chi phungreibingwui ngachaili juimeikap kaje phungrei sada sakara; kala phungreibingwuitungli juimeira; kala yur saikora chili longsangra, kala yur kachungkha rada hangra: “ralu, ithum Prohowui phungreili Jacobwui Varewui shimli kasa; chieina ana ithumli awui apong tamchitheida ithumna awui shongfali zatra. Kaja Zionwui eina ain chi shokra, kala Prohowui tui Jerusalemwui eina shokra*” (Isaiah 2:2,3). Maran Joelna hithada hanga, “*Kala naoda hithada shokra chiya, phasa khavai kachivali iwui mangla heirormira. Nanaomayara, nanaongalava ngarana maranra, khararnaobingna mang machutra, kala yaronnaobingna khamaha theira. Kala rao shanao, rao mayarnaobinglila, chitharan ina iwui mangla heirormira*” (Joel 2:28, 29). Naomeida maran Danielnala hithada hanga, “*Chitharan atungshongwui Varena khangazipa wungram akha sakara, chiwui sakashap vakashap pangshap chi yur khangateili mahorsangmimara. China wungram saikora sakathanhaora, kala chiya leichingra*” (Daniel 2:44). Ara hili

ithum tuikup akha khuirasa:

1. Wungram chi khanaowa zimiksholi sakara.
2. Chi phungreibingwui tungli sakara.
3. Yur saikora chili longsangra.
4. Asa khavaiya saikorawui tungli Prohona awui mangla heirora.
5. Okathui khamunga wungram khamatiyapa china mungda lei lakha

Wungram (prohowui wungram) chi sakara.

6. Wungram china okathuiwui wungrambingli yuihaida wungram chi-ya katangmavaila nganingchingra.

Ara, marantui saikora hi kali wungshung khala?

Kakathumali, Churchwui pongli ngashithairasai. John rahikmina wungram chi pangli leihairada hanga (Matthew 3:2). Chiwui kakhalatva nganailak haira kala chi masangluila sakahaora kajina. Khristana ngashithai, “*kala ina nali kahangna, na Peterna kala lunghar hiwui tungli ina iwui church sakara, kala kathiwui pangshapna chili mayuirarmara*” (Matthew 16:18). “Ana athumli hanga, “*Kachangkhat eina ina nathumli kahangna, Vareiwui wungram china pangshap eina ngasodakhara matheirang lakha kathi mamazapki kaji mi kaikha hili nganingdalei*” (Mark 9:1). “*Hithada kapihaili, kaja Messiahna kachotkachang phungphalungra kala kakathumathang kathiwui eina ringluira. Kala awui ming singda nathumna Jerusalem eina thuida miyur saikorali ningateida morei pheokhavai pao hashokra. Nathumna ot saikora hiwui sakhina. Kala yanglu, ina iwui Awawui ngashit kahai chi nathumli shiratra, kha atungshongwui eina nathumli pangshap chi mamiranglakha keinung hili honpamsalu*” (Luke 24:46-49). Ara azingli mikahai khamataiyabing hi machukngarum haosa.

1. Wungram chi nganaihaira da hanga.

2. Khristana thida ringluikahaiwui thilila wungram chi sakara da ngashithai.

3. Atam chitharan Khristali ngayur kasa kaikha mathila leisara chithada athumla wungram khara chi theira.

4. Chi pangshap eina ngasaoda rara.

5. Awui mingli ningkhangatei kala morei pheokhamiwui pongli yur saikorali hashokra.

6. Chi Jerusalemwui eina haophokra.

7. Jerusalem keinungli paokazatbingwui tungli atungshongwui pangshap tashungmira.

Atungli mikahai khamataiya bing hi ningli shaptithai salu, kaja ara naolak eina church sakakawui pongli ratahaoda kala saikora hi kakhala chitharan nana ngahahang eina theipaira.

Ara Otsak kapikasang khane harkhuida yangusa. Khani-kathumshi-

da ningsanglak eina palu. Bible kathembing /katamnaobingna hiwui atamli Church haokaphokna da mayai. Langmeida, apam chi Jerusalemna, atamna khanaowa zimikshona, Roman Shorkarwui awungabingna mungkasa atamna, pangshap tashungmi, yur saikorali ningkhangatei kala morei pheokhamiwui pongli hashokka, kala mi thingkathumshikha rahikda chithangwui eina church leiphokhaowa. Hithada acha haokaphokwui eina Varewui ningli machukhaikasa Church chi saka haowa, chiwui pongli maranhaikasa marantu-ibing kala tuingashitbing saikora wungshunghaowa.

Khangahan Bing

Lumashanda mashungda ngahankamilu.

1. Rimeithuida Church hi kali leisa khala?
2. Katharan Varena Churchli awui ngasakhavai kapangkhui khala?
3. Varewui wungram kharawui pongli marankhami Maran kathumwui aming hanglu?
4. Wungram chi karankha sangda nganingra khala?
5. Church sakara da khipana tuingashit sakhala?
6. Ana khipawui church sakara da ngashit khala?
7. Ana church kayakha sakara da ngashithaisa khala?
8. Wungram chi khieina ngasoda rara jikhala?
9. Jerusalemli khi hashokra ji khala?
10. Church haokaphokwui pongli kali kapa samphang khala?

Khamashung maningkha khanguipali circle salu:

1. Churchwui pongli reida machukhaisaya, maranhaisaya (propheesied), ngashithaisaya (promised) kala sakanaowa (established).

MASHUNGA/NGUIYA

2. Rimeithuida church Varewui ningli leihairasaya.

MASHUNGA/NGUIYA

3. Johnna hanga wungram nganaihaira da. MASHUNGA/NGUIYA

4. Wungram hi pangshap eina ngasoda raya. MASHUNGA/NGUIYA

5. Khristawui mingli yur saikorali ningkhangatei kala morei pheokhami wui pongli hashoka. MASHUNGA/NGUIYA

6. Church hi Jerusalemli haophoka. MASHUNGA/NGUIYA

7. Otsak kapikasang khane li church haokaphokwui pongli kapihai. MASHUNGA/NGUIYA

8. Hi Roman shorkarwui awungabingna mungkasa atamli rakashokna.

MASHUNGA/NGUIYA

9. Khanaowa zimiksho kajiji haophokhaira. MASHUNGA/NGUIYA

10. Marantui kala tuingshitbing chi wungshunga. MASHUNGA/NGUIYA

Azingli mikahaibing chili makapei tuiyarbing kapisanglu.

1. Okathui masaranglakhala khristali khangashikwui vang Varena ithum-
li.....
2. “Kala naoda hithada shokra.....
3. “Chitharan atungshongwui Varena khangazipa wungram akha saka-
ra,.....
4. “Lunghar hiwui tungli ina iwui.....
5. “.....eina thuida miyur saikorali ningateida morei
pheokhavai pao hashokra.”

KATAM KATHUM CHURCH SAKAKA

Thuikahai parali, khanaowa zimiksholi mangla kathara tashungmi-da Jerusalemlu Prohowui wungram kaja church sakara kala miyur saikora chili longsangra kala chi katang mavaila nganingchingra da Isaiah 2:2,3; Joel 2:28, 29; kala Daniel 2:44 wui eina tamngarumhaira. Kala Khristanala awui church sakara, chi pangshap eina ngasoda rara, kala awui mingli Jerusalem-wui eina haophokda miyur saikorali ningkhangatei kala morei pheokhami wui pongli hashokra da tuingashit kasa chi Matthew 16:18; Mark 9:1; kala Luke 24:46-49 li kapi kahai chi ithumna kapa samphang haira. Ara Otsak 2 harkhuilaga paakha marantui kala tuingashitbing saikora chili wungshungser haira kaje theikhuira.

Otsak kapikasang khane kapa eina ithumna theiya kaja paokazatbing atam chitharan Jerusalem keinungli pamserdaleisai da. *“Pentecost zimiksho khara eina shitkasangbing saikora apam akhali kaziprumsai. Kasuirak eina masi panglak eina kaphan thada akhon akha kazingramwui eina talaga athumna pamkasa shim chi pemtinghaowa. Kala malezak kakhui meiwon thada rada mikachivawui tungli rasazami. Chieina athum Mangla Katharana pemtinghaoda Manglana athumli matui khangasak tuiyur khangatei eina matuiphok haowa. Chitharan okathui apam kachivawui eina khara shitkasang khangazipa Jehudi kachungkha Jerusalemlu leisai. Athumna akhon chi kasha eina, mi kachungkha rakazipa, kala athum matakha haowa, kaja shitkasangbingna kachicharamtui eina matuikasa chi athum kachivana shai”* (Otsak 2:1-6).

Patamamansi kaja chili rangarumdaleikasa yur bing chi khi yur mamei khala kaji kapa samphangra, *“Chieina athum saikora matakha haoda maphakhuilakla akha eina akha hangaroka, “hi khivui kakhalat khala.”* Kha khangatei kaikhana manashida, *“Athum zamshei manglaga malip kahaina”* da hanga. Kha Peterna tharada akha chili ngasoda nganingka laga akhon panglak eina vaoda hanga: *“He Judea mibing kala Jerusalemlu kapama saikora, nathumna hi theimilu kala iwui tui hi ningsangda kha nganamilu, kaja nathumna kaphaning thada athum khamalip maningmana, arui pung kakhathumamang tathadharmaya. Shokda khalei hi Joel maranna hanghai kasa china: “Varena hanga, khanaowa zimiksholi ina hi shokngasakra: kaja mi saikorali iwui mangla heirorra, nathumwui naomayarabing eina naongalavabingna maranra, mahakhami nathumwui kha-nuithotbingna theira, kala ararnaobingna mang shimanra ... kala Prohowui mingli khangakao mi kachiva makahatlakla kahui samphangra”* (Otsak 2:12-17, 21).

Peterna rashokda khalei saikora hi kachama marantui wungkashungna da chithei kahaiwui thili Jishu khipakhala kaji hashoka. Kala ana Varena Jishuwui manga eina sakahai mina masakharara otsak, kala matakha kaka-

hai ot kala machut kasa saikora hili pheisin salaga Jishu hi mikumobingwui ngachaiwui eina Varena mayamida thao neomi kahai kala Khrista china kaji chitheimi. Khristali kathada khamunga bingwuili khuika kala makaphawui pang zangda ali kathada khrustli shaothat khala kajiwui ponglila Peterna hangchitheimamanda ali Varena kathiwui khangasheiwui eina khalamida ringlingasak haowa kaji ponglila hangchitheimiya. Awui tui nganada khalibingwui wuklung yuikhui khavaiwuivang ana Davidna Laa lairikli hangkahai marantuibingla phaningung ngasakda Jishu khrista ringkasawui eina thihaowa, kala chifahaowa kala chikhurwui eina ringshokda Kazingramli Varewui yashong khalei wungpamkhongli kapamhaira da pheichitheimiya.

Ana hashokmamanda hithada hangluiya, “*Varena Jishuli ringkhangasak ithum saikorana shakhina. Ara Varewui yashong pamngasakta, ngashit kahai Mangla kathara chi Avawawui eina samphanga kala ithumwui tungli heirorkhami chi nathumna kathei kala kasha hina. Kaja David kazing makamana, chithasalala ana hanga, ‘Prohona iwui Proholi hanga; iwui yashong pamlu. Nawui yangkashebingli ina nawui pheina masangasakrang lakha eina tangda’.* “Chiwui vang eina, nathumna khrustli shaothat kahaiya Jishu hili Varena Prohola, Khristala sangasak haira kaji hi Israelnao saikorana theikazakazakhairanu.” *Tui chi kasha tharan, athumwui ning sazahaoda Peter kala pa-okazatbing chili hanga, ‘Ivanaobing, ithumli khi saulu jikhala?’ Chieina Peterna hanga “Ning ngateihaolu, kala nathumwui morei pheomikhavai Jishu Khristawui ming singda nathum kachiva rahikhaolu, chithakha Mangla Katharawui lemnet chi nathumna samphangra. Tuingashit hi nathum kala nathumwui naongarali kala katawali khalei ithumwui Proho Varena hokakhui mi kachivali khamina”. Peterna khangatei tui kachungkha eina shakhi mida athumli kasatsangda poi, “Makhamashunga mithot hiwui eina yamshok khavai salu”. Awui tui khuikasanga mi saikorali rahikmi kala chithanghon mi thing kathum shakha ngarumsanga. ...Kala Vareli sochikatta mi saikorana ngahanngai. Huimi kahai mi Prohona athumli (churchli) thangthang ngarumsangmichinga”* (Otsak 2:32-42, 47).

Ara ithumna pakahai Varewui tuizabing (Scriptures) hili Prohowui church haokaphok zanghaira. Kala otshot saikora hi Jerusalemli rakashokna kajila theihaira. Paokazatbingwui tungli Mangla Kathara heirorkhami hi acha khareli maranbingna hangkhamaran chi wungkashungna, kala chi Peternala rinsit eina hangmiya “...*Shokta khalei hi Joel maranna hanghai kasa china*” (Otsak 2:16). Chithada sada shokta khalei saikora hi marantui wungkashungna kaji chili ning mongkhavai kala pangapakhavaila maleimana kaja tharzari haiya. Langmeida, maran bingna hi khanaowa zimiksholi rashokra da kahang athishurda kala Peternala hi maranbingna hangkhamaran athishurda rakashokna da hanghaokada church hi khanaowa zimiksholi sakanana da theikhuipai (maranbingna khanaowa zimiksho da hangda khalei hi

church haokaphok zimiksho ‘Pentecost’ zimiksholi kahangna). Paokazatbing-na ningkhangatei kala morei pheokhamiwui pongli hashokda leilakha yurzat saikora chili kazipsai, kala mi thingkathum paokaphawui kahang khangana wuivang huimida athumli churchli ngarumsanghaowa. Chithang Jerusalemlu AD 33li Prohowui church haophokda aja rashungda leichingdalei.

Khangahan Bing

Hi khipana kahangkhala kaji ngahankalu.

1. Khipana awui church sakara da hangkhala?
2. Khipana “Kala naoda hithada shokra chiya, phasa khavai kachivali iwui mangla heirormira” da hangkhala?
3. Khipana “Prohona iwui Proholi hanga; iwui yashong pamlu” da hangkhala?
4. Khipana “Ning ngateihaolu, kala nathumwui morei pheomikhavai Jishu Khristawui ming singda nathum kachiva rahikhaolu” da hangkhala?
5. Khipana “Makhamashunga mithot hiwui eina yamshok khavai salu” da hangkhala?

Marantui athishurda ngahankamilu.

1. Katharan Prohowui wungram sakara jisakhala?
2. Wungram chi khi keinungli sakara da hangkhala?
3. Wungram chili miyur kayakha longsangra jikhala?
4. Wungram chi khieina ngasoda rara jikhala?
5. Wungram chi atam karankha sangda nganingra jikhala?

Tuingashitbingwui thishurda ngahankamilu.

1. Khipana church sakara da hangkhala?
2. Church chi khieina ngasoda rara jikhala?
3. Khi hashokra da hangsa khala?
4. Chi yur kayakhawuivang hashokmira jisakhala?
5. Kala chi khipawui mingli hashokra jikhala?

Otsak kapikasang khane wui athishurda khangahan bing chi ngahankalu.

1. Khipalongna mangla kathara samphang khala?
2. Manglakathara razanghaira kajiwui khudam chi khikhala?
3. Peterna mibingli Khrista hi Varewui Naomayarana da kathada shitsang

ngasak khala?

4. Mibingna paokazatbingli khi ngahan khala kala athumli khi ngahanka khala?

5. Huimikahai athumli khipana churchli ngarumsangmi khala?

Azingli mikahaibing hi kasha eina meikhailu:

1. Church.
2. Marantui.
3. Pentecost.
4. Ningkhangatei.
5. Rakahik.

KATAM MATI CHURCHWUI MACHUT

Shiman kahai ngasotnao akhali kathada phakhuira? Khangacha eina, nana ali machutkapaiya machutbing khimameikhala rilak eina kazipkhui chiwui thili ali phakhuikhavai karpkhokhaora. Machut saikorali khangaman-na mi samkaphang chitharan nana phada khalei mi chi hina da khuisangna-ora. Chi takam eina aja okathuili church kachungkha leidalei. Khamashun-ga church hina da kathada phashokpaira kala theikhuishapra khala? Khamashunga churchwui machut saikora khuilaga leidakhalei church bingli ngaheoyangra chithada khamashungapaji hina da nana theikhuipaira. Kha, khamashunga church chiwui machutbing khimamei khala kala machutbing chi kali samphangpaira? Saikora hi Biblena ngahanka mira.

Machutbing chiya:

1. **Church chi Khristana sakaya.** “*Kala ina nali kahangna, na Peterna kala lunghar hiwui tungli ina iwui church sakara, kala kathiwui pangshapna chili mayuira mara*” (Matthew 16:18).

2. **Church chi Jerusalemla haophoka.** Hiwui pongli Luke 24:45-49 kala Otsak 2:5 li kapihaidalei.

3. **Church chi A.D 33li haophoka.** Atam hi kathada theikhala jila Otsak kapikasang khane wui athishurda church hi Pentecost zimiksholi haop-hoka, china kachitheina kaja Otsak 2 wui otshot hi AD33li rakashokna kala churchla atam chitharan haokaphokna.

4. **Church chi Khristawui ming ngavaiya.** “*Khristawui church saiko-rana nathumli shalam mili*” da Paulna chithi kapiya (Romenao 16:16). Kala ana corinthli khalei churchli hithada kapida hangluishita “*Nathum saikora Khrist-awui Phasana*” kala nathum chiwui akai avavasera” (1 Corinthnao 12:27). Kha, Phasa chi khikhala? Phasa chi churchna. (Ephesianao 1:22, 23).

5. **Church chiwui mipha saikorali (members) khristashi (Chris-tian) da hoi.** “... *shitkasangabingli Christian hokhare hi Antiochlina*” (Otsak 11:26). “*Agrippana Paulli hanga, Atam kashakha hiwui alungli nana ili Christian ongasakshapra da phaningla.*” (Otsak 26:28). “*Kha shitkasangmi (Christian) akha sada kachotkachang sam-phangakha chiwuiwang makhayakalu. Khristawui ming samkaphangwui vang Vareli ningshitha-ki kajina*” (1 Peter 4:16). Khanaowali hi phaningunglu kaja “*huikhami hi khangatei khipakhawuilila maleimana, okathui hupvali mibingwui ngachaili aming hi maningla khangatei humishapa aming mikahai maleimana*” (Otsak 4:12).

6. **Khrista hi churchwui akhamang kaji akuia na.** “*Ana awui phasa, kaja churchwui akuiana, haokaphoka, kathebingwui eina pharashok kharena. Cheina*

ot saikorali ana mataimeikapa” (Colossianao 1:18).

7. **Church akhamanga.** “*Varena nathumli hokakhuichili kachihan akhamang kaji thada phasa akhamanga kala mangla akhamanga*” (Ephesianao 4:4). Phasa chi churchna (Colossianao 1:18) chithada sada phasa akhamangakha church-la akhamanga.

8. **Church chili kathada zangpairo.** Mi akhana church chili zangra chiakha awuili hibing hi leiphalungra chiya, Shitkasang (Hebrewnao 11:6), ningkhangatei (Otsak 17:30), shitkasang hangkaphat (Romenao 10:9,10), kala rakahik (Mark 16:16). Huimikahai mi chili Prohona churchli ngarum-sangmiya (Otsak 2:47). Langmeida Romenao 6:3, 4; Galatianao 3:26,27; kala 1 Corinthians 12:13 tuicha bing hina hanga kaja ithum Khrista kala Awui churchlungli rakahikna da. Kasokahaibing hi kasa eina ithum awui wungram kaja churchli pharasang kahaina (John 3:3-5).

9. **Churchwui khokharum hi ngakheikhang haiya.** Christian bing haptawui kharethang kazipngaruma (Otsak 20:7) laasak eina masotmi khavai (Ephesianao 5:19), seiha sakhavai (Otsak 2:42), varetui tamkhavai (2 Timothy 2:15) Prohowui phakachizat khuikhavai (Otsak 20:7) kala Vareli chikat khavai (1 Corinthianao 16:2).

10. **Churchwui Tamkachithei (doctrine) hi Bible mangli pheisin saya.** Bible hi Churchwui tamkachitheina da chili ngarumkasang, chiwuieina khuikashok, kala chiwui mathun sada khangatei akha shikachin maleila mayai (Phongkhami 22:18,19). Bible hi churchwui akhamang kaji churchwui shitkasangna. Ngarumkasang lairik kala shitkasang bing makhui-sangmi mana.

11. **Church wui otsak-khangarum hi Varewui kaphaning athishurda leiphalungra.** Khrista hi chiwui Akuiana (Ephesianao 5:23) church ashangva (local congregation) kachiva kachichawui Church ararbing kala deaconbing leira (1 Timothy 3; Titus 1). Okathuli Prohowui churchwui Akuia pamkhavai (head quarter) malei mana, kala mikumona shemkakhui churchwui longnao kathatha hila maleimana.

12. **Churchwui otngarut hi kathum sada khaiya.** Otngarutbing chiya, Paokapha hakashok (Mark 16:15,16), khavat-khangazanbingli khangachon khami (Galatianao 6; James 2), church memberbingli manglarin eina rarka khangasak kaja shitkasangli reisangkavai kasa (edification) (Hebrewnao 3:12-14).

13. **Christian kachiva shitkasang kathuka mirin ringphalungra.** Okathuili maleishipai mara (1 John 2:15), kha manglawui athei matheiphalungra (Galatianao 5:22,23). Shitkasang kathuka a china Kharin-

gawui kuihon samphangra (Phongkhami 2:10).

Hibing hi Biblewui eina kakhui churchwui machut bingna. Machutbing hi eina nawui churchli ngaheoyanglu. Chansam sada, khareya machut mati chi khuilu. Nakhalata ngahanlu kaja “I wui church khipana sakakhala?” “Khristana kasaka maningkha mikumo kasakhala?” Kala “iwui church hi khi apamli haophok khala?” “Jerusalemlu haophoka maningkha apam khangatei akhali haophok khala?” Nakhalatta ngahanmamanlu, “iwui church khikumli haophok khala?” kalikhada AD 33li mahaophoksaakha chi Prohowui church maningthura kaji theilu. Khanaowali “iwui church khipawui aming ngavaikhala?” da ngahanlu, Khristawui aming maningla khangateiwui aming ngavaisaakha kathada chi Khristawui church ngasapaira khala? Khangahan kachungkha sapai kha hinala nana leidakhalei church Prohowui churchka maningkha mikumowuikhala kaji theikhavai shapa. Machutbing hieina khangatei churchbinglila ngaheoyanglu kaja athum Varewuika maningkha Varewui makhaningkhala kaji theikhavai. Ina shitsanga kaja khalatali ning tharshapakha ngateikhangarokji nala theishapra da.

Nana member akha ngasada khaleiya church chi Biblewui church makhaningngasasaakha, chi naothahaikhavai nali hangmidalei. Khamashung tamkhuilu, chiwui kahang nganalu kala Varewui tuili kapa samkaphanga church chili ngarumsanghaolu. Chithada, nala huikhami samkaphanga churchwui lungli leipaira.

Khangahan Bing

Mashungda ngahankalu.

1. Atam kasangkawui mangali shiman kahai ngasotli kathada phakhuira?
2. Okathuili mamaya khangarok church kachungkha leidaleila?
3. Khamashunga church chi kathada theishapra?
4. Churchwui machutbing chi kali phaakha samphangra?
5. Church khipana saka khala?
6. Church kali haophok khala?
7. Khi kumli haophokkhala?
8. Church chili khi aming eina hokhala?
9. Phasa chi khikhala?
10. Churchwui mipha avavali (member bingli) khi hokhala?
11. Churchwui akuia chi khipakhala?
12. Church kayakha lei?
13. Khi apong eina church chili mingchanpaira?

14. Khrista kala awui churchlungli kathada zangra?
15. Khokharumli khimamei sakhala kaji kapitalu.
16. Churchwui tamkachithei (doctrine) khikhala?
17. Local church kachivali khi leingayikhala kaji hanglu.
18. Churchwui otngarut kathum chi kapilu?
19. Vareshibing khi mirin ringayikhala?
20. Khipana kharinga kuihon samphangra khala?
21. Mikumona haokaphok church chi Prohowui churchna da hangpairala?
22. Jerusalemlu mahaokaphok church chi Prohowui churchna da hangpaira-la?
23. A.D 33wui thili haokaphok church chi Prohowui churchna da hangpaira-la?
24. Khristawui ming makhangavai church chi Khristawui church ngasapai-rala?
25. Nali huikhami chitharan Prohona nali khi churchli ngarumsang khala?

KATAM PHANGA CHURCHWUI AMING

Church hi kathara tuiwui eina kharana chiakha, churchwui amingla kathara tuiwui eina khuiphalungra. Kha chithasai jilala mikumona sakakhui kala mikumowui ming phoksang kahai churchla kachungkha leipapama. Hi kathada rashokhao khala? Chikatha church kaikhawui aming church haop-hokhamiyali khayakashhi khami sada awui ming eina phoksanga chansam tuili “Lutheran” katha. Kaikhanava tamkachithei (doctrineli) li kaja Rakahikwui tamkachithei kala khi ara eina Prohowui pao hakashok otmanga khuikhala kaji chili pheisin salaga churchwui aming phoksangmi. Kala kaikhanava Zimiksholi tekmateingasakda churchwui ming chieina phoksanga, chansam tuili “Pentecost” kala “Sabbath” hkt. Khangatei kaikhanava Churchwui otngarutli, matailak eina churchwui ararbingwui (presbyters) otngarutli khamataiya khami sada kala Ararbingna khamunga churchna da chili pheisin salaga churchwui aming phoksanga. Church hibing hi kala hikatha church khangatei kachungkha china Khristana samphang khangayi tekhamate, masot kala khaya saikora khuida mikumona sakakhui amingbingwuiwang mikahaina.

Mikumona sakakhui aming shikachin hi apong kachungkhali nguiya. khiwuiwang khala jila, Khareyali, china ithumli kaingasaka. Kala china ithumwui ngachaili Varena mashokngasak khangai ngateikhangarok kala khaikhangarok hi leihaowa. Chithada sada hanglaksa chiakha hikatha otsak hi John 17li Jishuna ithum saikora akha ngasapai khavai seiha kasa Seiha chili khangararna kala makhamayana da hangpai. Kakhaneyali, chithada mikumowui ming kasing hi Varetuina khayon mida mamaya mana. Kaja paokazata Paulna 1 Corinthiano 1:10-17li mikumowui ming singda kaikhangarok kala ashi-ishi da khaikhangarok hi khanguinada chitheihaidalei. Kakathumali, Mikumona sakakhui aming kasing chitharan aming china Khristawui pam rakakhuina, kha Varetuili hithada kapihai “*Huikhami hi khangatei khipakhawuili maleimana, okathui hupvali mibingwui ngachaili aming hi maningla khangatei huimishapa aming mikahai maleilakmana*” (Otsak 4:12) Khamatiyali, chikatha aming kala mingpho china shitkasanga ashangvawui ngachaili thanxhangui, pakhangapa, kala nguida shitsangkhangasak hikathatha hi rashokngasaka. Kala china mashitkasang shokngasaka. Kaphangayali, hikatha aming kala mingpho hina chi kasingbing kala athumwui vang eina Khristawui eina mai ngareithui kahai bingli kashiman ngasangasakra. Mikahai marambing hiwuiwang eina mikumona sakakhui aming phokkasang hi nguiya kala chi moreina kajina.

Churchwui pongliva, chi Khristana sakarada ngashithaisai (Matthew

16:18), kala hithada hanghaiya kaja chi Khrista akhalatawui ashee eina lokhu-
iya da (Otsak 20:28) chithada sada a chiwui Huikhamena (Ephesiano 5:23)
kala chiwui akuia chila Ana. Hiya khangachana kaja church china ali haop-
hokhamiya, huikhami, sakakhami kala akhalatawui akuiali tekhamate kala
khayakashhi khami sada Awui mingli sari sada ngavaiya. Paulna Romeli kha-
lei churchli chithi kapiya kala awui ruinganaili khalei church saikorawui (lo-
cal congregation) shalamtui eina ngasoda chiphuna, chithi chili ana hithada
kapihai “... *Khristawui church saikorana nathumli shalam mili*” (Romenao 16:16).
Kala Corinthli khalei churchlila hithada kapida hanga “*Nathum saikora Khrist-
awui phasana kala nathum chiwui akai awavasea*” (1 Corinthnao 12:27), phasawui
kakhalat chiya church kajina, chithasada Paulna Khristawui churchwui pongli
matuidakhaleina da kahang chili khangui maleimana. Churchwui aming Va-
rewuitui thishurda Varewui church (1 Corinthnao 1:2; Otsak 20:28), Varewui
wungram (1 Corinthnao 6:9), Khristawui wungram (Ephesiano 5:5), Awui
khaluma naomayarawui wungram (Colossiano 1:13), ithumwui Prohowui
wungram (2 Peter 1:11), Kharinga Varewui church (1 Timothy 3:15). Naoch-
ichaibingwui church (Hebrewnao 12:23) da theipai.

Chithada sada, churchwui aming hi mingpho akhamang eina hophal-
lungra kaji maleimana lah ali aming akha milaga chieina hophalungra kajila
malei mana. Hila phaningung phalungra kaja Varewui ot chi Khristawui-
na kala Khristawui chi Varewuina. Kala atungli mikahai churchwui ming
saikora hi Khristana sakaka churchli khami amingsera. Church hi Khrist-
awui maningakha kala Khrista hi chiwui akhava maningakha church chi kh-
ipawuira khala kala chiwui akhava khipara khala? Awui ashee eina khalo
sahaoda awui ngasachingra. Langmeida, atungli biblewui athishurda mika-
hai churchwui ming kala mingpho bing hiyakha leikahaiwui thilila kaikhava
Prohowui churchwui vang Varetuili makazang mingpho phasangmingainada
khalei zangkapa. kha Ithumva Biblena kahang athishurda sasa kala Biblena
churchli kathada hokhala chithada ithumla hosa chithada kasa eina ithum
mashungpaira.

Church memberbingli kathada hokhala kajila Bibleli ngahahang eina
kapikahai leiya. Chiwui pongli Isaiah marana marankahai chiwui eina yang-
phoksa. Ana hithada hanga kaja Varena awui mibingwuiwang aming kad-
har mira da (Isaiah 62:2). Aming chi naoda atam kasangkhawui thili Paulna
phungzata (Otsak 9:15), kha aming chi Gentilenaobingna (Jehudi makhan-
ing yur kateibing) paokapha makhuisangranglakha eina tangda mamimana,
kaja marantui thishurda aming kadhar hi yurkateibingna paokaphawui ka-
hor chi kathei tharan mikikajina. Marantui hi Syriawui Antioch kaho apamli

khalei khristawui thikashurabingli khareya sada ‘Christian’ da aming kadhar phoksangmida chili wungshungnaowa (Otsak 11:26). Naoda Paulna awunga Agrippa li paokapha hashokhami chitharan ali awungana ngahankaka tuichi ithumna kapa samphanga chiya “*Agrippana Paulli hanga, Atam kashakha hiwui alungli nana ili Christian ongasakshapra da phaningla*” (Otsak 26:28). Khanaowali Peternala hithada hanga, “*Kha Shitkasanga mi (Christian) akha sada kachotkachang samphangakha chiwuivang makhayakalu. Khristawui ming samkaphangwui vang Vareli ningshithaki kajina*” (1 Peter 4:16).

Hithada sada Kadhara Tuingashit atamli Khristawui thikashura bingli Christian hoyu kaji hi theipailaka. Ajala Prohona ithumli ngaraikacha aming chieina theichinga. Kachikathana Christian kaji ming chili khangatei mingpho akha ngarumsanglui laka phoksangakha chikatha mi chi khamashunga Christian maningmanada theipai. Christian kaho mingpho hina ithumli okathuiwui eina ngateingasak kahaina, kala Prohowui ningkachangla chipapama.

Church kala memberbingwui mingli Khristawui ming tekmateingasak phalungra. Khiwui vang khala jila chi shimkhurwui mingna, (Ephesianao 3:14,15) saikorawui tungli hakmeikap kaji amingna (Philippinao 2:9-11), kala akhamang kaji huimishapa amingna (Otsak 4:12). Chithada sada, ithum Khristawui mingli shitsangphalungra (1 John 5:13), Awui ming hangphatra (2 Timothy 2:19), Awuimingli ningateida rahikra (Otsak 2:38), Awui mingli kazipda khorumra (Matthew 19:20), otsak kachiva Awui mingli sara (Colosianao 3:17), chithada awui mingwui manga eina katang makhavai mirin samphangra (John 20:30,31).

Kapikahai saikora ningli shaptithailaga khipana, “aming hina khamataiya maning mana” da hangshapra khala? Kachangkhat eina kahangna kaja mikumona sakakhui aming kala mingpho hili huikhami malei mana, kha mingpho bingchi shikachinwui vang kashiman ngasara. Huikhami hi Khristawui mingli maningla kateili maleimana.

Makapei chili mazansanglu:

1. Church hi kathara Varewui tui athishurda kasana chithada sada,
.....
2. Mikumona sakakhui aming shikachin hi.....
3. ithum saikoranagsapai khavai seiha sai.
4. “Varena awui mibinglimirada maranhai saya.

‘Mah’ jiraka maningakha ‘maningmana’ jirakhala ngahankalu:

1. Churchwui ming hi Varetui athishurda phoksangmi phalungrala?
2. Mikumona phokasang aming kala mingpho shikachin hi nguila?
3. Huikhami hi Khristawui mingli leila?
4. Prohona aja ithum saikorali ngaraikacha aming ngavaingasakngai dalei-rala?
5. Kachikatha akhana Proholi tekmate ngasakpairala awui ming masingla?

Mashungda ngahankalu:

1. Mikumonana sakakhui aming bing chi kathada rakhala?
2. Khiwuiwang eina mikumona sakakhui aming bing chi nguiya kajikhala kajiwui pong kapitalu.
3. Khiwui vang Jishuna seiha sakhala?
4. Achina ngarabingwui ngachaili nganangarokda kaikhangarok chitharan Paulna athumli khi hangmi khala?
5. Khiwuiwang churchna Khristawui ming ngavaingayi khala?
6. Romenao 16:16 khi kapihaikhala kapitalu.
7. 1 Corinthiano 12:27 wui thishurda church hi khikhala?
8. Varetuili kapikahai athishurda churchwui aming bing chi khi mamei khala kapitalu
9. Church hi Khristawui maningakha khipawuira khala?
10. Churchwui mipha avavali (Church member bingli) khi hokhala?
11. Christian kaji aming kazang Bible tuiza kathum chi khimamei khala kapitalu.
12. Aja Prohona ithumwui ngachaili khi leingasakngaidaleira khala?
13. Vareishi ayur khangatei akha khangasa hi mashungla?
14. Khiwui vang Khristawui ming khangangayikhala?.
15. Ithum Khristawui mingli khi sakhala?

KATAM THARUK CHURCH WUI OTSAK-KHANGARUM

Church hi Khristana sakakana (Matthew 16:18). Church chi huimida hokhuikahaiyabing eina kashemna (Colossianao 1:13,14; Otsak 2:47). Chi Khristawui phasana (Colossianao 1:18) kala phasa akhamanga (Ephesianao 4:4).

Khangacha eina ‘church’ kaji hi mi saikorana bhapta kapai apong eina shichindaleilakha, chili Local church shasha kala thing-thing ngarumkahaina kaji hi theiphalungra, kala shitkasanga mipha avava ngarumda local church hi kashemna. Chiwui kakhalat chiya, churchwui shorkar hi local lungli khaleina, yur kala okathuiwui thakli khalei longnao maning mana. Khangatei apong eina hangsa jiakha Prohowui church okathuili chiwui akuia maleimana kala akuia pamkhavai shimla maleimana.

Katharatuina Khrista hi churchwui akuiana da tamchithe. Azingli kapikahai tuiza bing pamamanda machukyanga, “*Ot saikora Varena Khristawui pheizingli haimi, kala churchwui vang ot saikorawuitungli akhava sangasaka. Church hi Khristawui phasana, kala chi ana khavat maleila pongasaka*” (Ephesianao 1:22,23). “*Khristana Awui phasa, churchwui akhava kasa thada gaharana preiawui akhavana; Kala Khristana awui phasa, church wui huikhamena*” (Ephesianao 5:23). “*Ana awui phasa kaja churchwui akuiana, haokaphoka, kathebingwui eina pharashok kharena. Chieina ot saikorali ana mataimeikap kajina*” (Colossianao 1:18). Kathara varetuina ithumwui vang khi tammidalei khala? Hangkahai chithada, Khrista hi awui phasa kaja churchwui akuiana. Akui kayakha lei khala? Akhamanga, chi Khristana, kala ana khipalikha awui pam khuikhavai kala khuingarum khavai mashun mikahai malei mana.

Khrista hi Churchwui akuiana, chithada sada local church kachivawui akuiala ana, kala churchwui mipha kachivawui akuiala ana, chiwui vang eina Paulna hithada hanga “*Kha ina nathumli theishinkhui ngasakngai kaja Khristana mi kachivawui akhavana, gaharana pareiawui akhavana, kala Varena Khristawuina*” (1 Corinthianao 11:3).

Khristana akuia sada, kala churchwui phasarin kala manglarinwui khavat-khangazanli yangsangmi khavai ararbing kala deaconbing kapangkada local church kachiva kachichawui ot-sakrum leiphalungra. Churchwui Ararbingna matailak eina church mipha avavawui mangla yangsangmiya (Hebrewnao 13:17); kala deaconbingna phasarinwui khavatli rinlaga yangsangmiya (Otsak 6). Hila theilu kaja kathara tuili local church kachivali arar kala deacon akhali chungmeida leiya kajiwiwui pongli matuichinga, kha arar

kala deacon akhamangna local church akhali munga kajiwui pongli kapi-kahai maleimana. Local akhawui church ararbingli kala deaconbingli khangatei Local church akhawui maningakha local church kachungkhawui tungli pangshap singkhavai mashun mamihai mana. Kaja kachicha ramli khalei church saikora Khristana akui khangasawui azingli ichichawui kathanaobing (ararbing kala deaconbing) kapangkada ningkhanwui lungli khaleina. Local Church saikora khokharumwui lungli leishimi khangarok kala lumashanmi khangarokwui ngarumsak leiya, chi maningla akhana akhawui tungli pangshap kasing kala khamungawui otsak kasa hikathatha hi malei mana.

Arar, pastor, bishop, yaokahoma, kala presbyter kaji aming saikora hi otpam akhali mikahai mingpho serra. Chithada sada arar kaji hi yaokahoma kala bishop kajina. Athum mangateingarok mana. Paulna Titus 1:5-9 li kachikatha mina arar akhawui otpam phungran khala kajiwui pongli chitheikhami sada hithada kapihai dalei “*Sakhangayi apam kachivali churchwui kathana kapangsang khavai ina nali Creteli chipam kahaina. Ina hangchithei kahai chi phaningunglu. Kathana saki kaje mi chi shat makaka saphalungra, pareiva akhamang phalungra, naongarala shitkasanga, kapa ot masala kahang khangana ngasaphalungra, kaja yaokahoma hiya Varewui lanse akha sada shat makaka mi saphalungra, malangsophalungmara, malungmavatzarphalungmara, khamarip, khangashao, kala tongza khavai khangamar ot masaphalung mara. Kha khamimali ngahankatha, kapha sakhangai, khalatta ngarinkatha, khamashunga, kathara chamsin katheia saphalungra. Tamchithei kahai khamashung tui chi singtitphalungra. Chithakha khamashung tamkachithei chi ana hangchitheishapra, kala tui khangayatbing chili athumwui khayon chitheishapra.*” Kathara tui hi horzak eina 1st Timothy 3:1-7lila kapihai dalei. Chithada sada arar akhawui otpam hi church mipha kachivana khuisingkapai maningmana, kha kapi kahai athishurda khuikharan china khuikikajina, kala kachikatha akhana a matikchahaira da amangna otpam chi makhuisingpai mana kaja chikatha mi akhali langphalungra. Kalikhada churchwui lungli chikatha arar sakhavai mapungpha kahai mi maleirangakha mayarnaobingna churchwui lansingwui pongli athumna yangsangmira, chithamamanda athumna manglarinli rarasangmamanda mapungphakahai chitharan athumli ararbing sakhavai kapangkanaora.

Ararbingli kakapang chithada athumli ngachonmi khavai deaconbingli la kapangkai. Athumli ngachonmebing dala hoyu, athum hi ararbingna chijakhamiwui azingli otmangakhuiya. Paulna kachikatha mina deacon sangayi khala kajiwui pongli hithada kapihai dalei “*Chi takam eina deacon saki kajibingla ning mazingphalungra, tui khani mamatuiipaimana, mamarippaimana, kakharamli akachanga masapaimana, shitkasanga kathuka tui chi athumna singtitphalungra, rida*

athumli chang yangfalu, laga chukhara maleimana da theikhui kahaiwui thili deacon sana-oranu. Chithada athumwui preiva ngarala mina khayashikapaia, maphenphapha kapaiya, ngarakzak kahaia kala ot saikorali shitsangkapaia ngasaphalungra. Deaconpa chi preiva akhamang kaje, kala naongarali, shimkhurli nganaokatheia ngasaphalungra. Deacon sada mathalak eina otram khangathabing china mai kai, kala Fishu Khristali shitkasang chiwui tongkaza kachungkha samphanga” (1 Timothy 3:8-13).

Hi manglarin eina churchwui otsak-khangarumna. Khristana akui-ana chieina ngasoda Local church kachivali ararbing kala deaconbing khaleina, kala athumwui azingli pao hakashokabing (preachers/evangelists), ojabing, kala church memberbing khaleina. Khristawui apongli (shongfa), Kachikatha church ashangva (local congregation) akhana mathuihaisalala khangateibing mashungda zatpai kala church ashangva saikora mathuihaida akhamang taihaisala, akhamang china shitkasangwui lungli mashungda zatpaishonna. Local church kachivali Prohona otsak-khangarum leikhangasak hi ningkhan kala akhana akhali machihan kapai wui lungli leikhangasakna. Athum saikorali mikumona sakakhui ayinna khalapngarum kahai maleimana leikashina maningakha. Khristawui lungli akha sada athum akha eina akha khokharumli ngarumsak lei kala Khristawui mingli akha sada otsakngaruma kala otmanga khuingarumpai. Awui apong chiya mathasangngasakmaman-ra kaji masapai mana.

Kathara tuili Peterna churchwui akuia khangasawui pongli kapikahai maleimana, lah kachikatha mi akhana churchwui akuia saya kajila maleimana. Bishop akhana Local church kachungkawui tungli munga kajila maleimana lah pastor hi local church akhawui akuiana kajila maleimana. Kala churchwui lungli hibing hi thao neomikahai, tamkhuikahai kala themkahai bingna (ordained people/trained/clergy) kala hibing hina icham-cham kahai, mathei-thangkamei memberbingna (laity/untrained) da kapikahaila maleimana. Okathuili dharma kazatta mi chungkhameina Varewui churchwui otsak-khangarum chiwui eina ngateithui haowa. Chinala maram akha sada okathuili mamaya khangarok kala kaikhangarok kachungkha kashokna. Chithada sada, Varewuitui athishurda churchwui Otsak-khangarum chi kathakhala chithada sakhavai Bibleli hanung haosa.

Khanghan Bing

Azingli mikahai khangahanbing hi mashungda ngahankalu:

1. Church khipana sakakhala?
2. Church hi khi eina saka khala?

3. Church hi Khristawui phasana kaji hi manglarin eina kahangka manin-gakha phasarinli kahang khala?
4. Church kayakha khala?
5. Khangacha eina church hi apong eina shichinna.
6. Church hi shasha kala thing-thing eina ngarumda kasana.
7. Churchwui shorkar hi khaleina.
8. Prohowui church okathuili chiwui akuia, kala akuia pamkhavai shim maleikhala?
9. Churchwui akuia chi khipa khala?
10. Churchwui kathanna bingli khi mingpho eina hokhala?
11. Churchwui ararbing kala deaconbingwui otngarut khikhala?
12. Church kachivali ararbing kala deacon bing kayakha leirakhala?
13. Churchwui ararbingli khangatei khi mingpho einala hopai khala?
14. Church arar akha sada ana leikhangayi acham-aram bingwui pongli khi lairikli kapihai khala?
15. Church deacon bingna leikhangayi acham-aram bingwui pongli khi lairikli kapihai khala?
16. Churchwui ararbing kala deacon sakhangayi church member maleisalala thada kapangsangpairala?
17. Churchwui arar kala deacon saran kahai mi maleirangakha khipalongna thanmira khala?
18. Apam ngatateidali khalei local churchbingli kathada akha sada khalapmi khala?
19. Varena churchwui otsakkhangarum hi hithada leirano da samikhahai chi ngacheipairala?
20. Varewui tui athishurda Peter hi churchwui akuila?
21. Bibleli Bishop akhana local church kachungkhawui tungli kathanao akha sada khamungwui pongli kapa samphangla?
22. Yaokahoma akhamangna church akhawui kathanna saya kajiwui pongli Bibleli kapa samphangla?
23. Bibleli churchwui lungli hibing hi thao neomikahai/ kapangkahai bing (Clergy) kala kaikhana ichamcham kahai member (laity) bing da kakhai wui pongli kapa samphangla?
24. Khiwuivang eina okathuili churchwui lungli kaikhangarok kala mamay-akhangarok kachungkha rashokhao khala?
25. Khamashunga church semka khavai chiwui maong (Pattern) kachiwui eina yangkhuiira khala?

KATAM SHINI CHURCHLI KAZANG

Ithumna tamngarum kahaiwui lungli Churchwui khamataiya khikha-la kaji teomeikha kathei samphanghaira. Khristana Churchwui vang thimiya (Ephesianao 5:25), chi Akhalattawui ashee eina lokhuiya (Otsak 20:28), Chiwui Huikhame chi Ana (Ephesianao 5:23), kaji saikora hi kathara kathara tuili ngahahang eina kapikahai tuina. Ithum khalatta khangahan sasa kaja: Khikha makhaning/ khamataiya makhaning ot chiwui vang Khristana thimirla? Makankhana ot wuivang Akhalattawui ashee tamida lokhuirala? Churchwui ayarli huikhami samphangpaiakha A khiwuivang churchwui huikhame ngasadaleira khala? Nali chithada khangahan sasi kaja nala maning mana da ngahankara kala chi khamashungna. Chithaakha khiwui vang church hi khamataiya maningmana jihao khala kala church wui member mangasalala huikhami samphangpai jikhala? Chithada kahangbing chi church kaji hi khikhala da bhaptanguida khaleibingna kala china athumli thanguikahaina.

Bibleli church hi huikhamena da tamikahai maleimana kha kachikatha mi akhana huikhami samphangkhavai chiwui lungli leiphalungra da tamiya. Marikhong chi huikhame maningmana kha tara kaphongwui eina huikhami/kankakhui samphang khavai Noah kala awui shimkhur marikhongwui lung khalei darka sai, churchla chikathana. Chimang maningla huimikahai athumli Prohona churchli ngarumsanga. Pentecost zimiksho thang mibingna paokapha hakashok chi shada kahang khangana chitharan Prohona athumli churchli ngarumsanga kala zimiksho chiwui thilila huikhuimaman kajibingli Prohona awui churchli ngarumsang mamanna, “*Kala Vareli sochikatta mi saikorana ngahanngai. Huimikahai mi Prohona athumli (churchli) thangthang ngarumsangmichinga*” (Otsak 2:47). Chithada sada humikahai mi chi Prohowui church member ngasakahaina. Kachikatha mi akhana Prohowui church member maningmana chiakha mi chi huimikahai mi maningmana kajihi theipailak kahaina. Khangatei apong akha eina hangsa chiakha, churchwui ayarli huimiya kaji maleimana. Denominational church wui member kala mikumona sakakhui ahangva akhawui member mangasalala huikhami samphangpai kha Khristawui church member mangasaakha mi chili mahuimipai mana.

Prohona ngarumsangkhami maningakha ithum hithada tamngarumda churchli ithum khalatta razangkapai maning mana. Prohona churchli huimikahai athumli ngarumsanga chithada sada church hiya huikhami samphang kahai bing eina sakakhui phasana/vareshimna. Mi akhana ningkathar eina

kahang nganada khuisangda khaleiga maningmakhala kaji theikhavai Prohona mi chiwui ning-wuklungmangli yanga. Mi akhana ningkathar eina khuisangakha chikatha mi chili Varena churchli ngarumsangkhamina. Ningkathar mazangakha ali Varena mangarumsang mana. Otsak eina saran kala sakhangayi saserhaida mikumo ithumna awui wuklung matheikharar wuivang ali church member akha ngasahaira da khuisangmisalala Varena ali makhuisangmi mana. Ithumwui ningkhan eina churchli zangpai jisi kaja ningwuklung khayangwui khamataiya maleimara da khuiya. Chiwui vang mi akhali churchli ngarumkasang kaje hi Varewui otna kaja Ana theiya kachikatha mina ningthardalei kala ningmatharma khala kaji hi.

Khrista hi churchwui huikhame akha sada chili huimikahaibingmangli ngarumsanga. Churchli ngarumsangpai khavai Prohona ithumli khi sangasakngai khala kajiwui pongli yangarumsa. Ana sangasakhangai chi khikhala kaji kathara varetuili tharzari eina kapimihai dalei, matailak eina Otsak lairikli mavareshinaona vareshi khangasawui (conversion) kharachan kachungkha kapihaidalei. Kha matailak eina Prohona khi kasabingli churchli ngarumsangmikhala kaji pheikar avava eina yangarumsa.

1. **Khamashunga tui kasha samphang phalungra:** “*Chithada sada kasha eina shitkasang shoka kala Khristawui apong hakashok eina kasha samphanga*” (Romenao 10:17)

2. **Vare kala Khristali shitsang phalungra:** “*Jishuna hanga ‘wuk makhanangalu; Vareli shitsangmalu, kala ilila shitsanglu*” (John 14:1).

3. **Moreiwui eina ningateiphalungra:** “*Maningphut mana! Ina nathumli kahangna, nathumla ningmangateiakha chithada shimanra*” (Luke 13:3).

4. **Khrista hi Varewui naomayarana da mibingwui mangali hangphat phalungra:** Jishuna hithada hanga “*kachikathana ili mibingwui mangali phongshar eina mayaakha kazingramli khalei iwui awawui mangali inala ali mayamira*” (Matthew 10:32).

5. **Morei pheomikhavai rahikphalungra:** Rakahik hi Khristali chikhurli kachizan kala awui ringkhalui wui amaha sada morei kaphungali taralungli chizanda tarawui eina midhar sada ringluikhangasakna (Romenao 6:3, 4; Otsak 8:26-39). “*Shitsangda rahikahai mi chili huimira; kha mashitkasang mi chili khayon mira*” (Mark 16:16). “*Chieina Peterna hanga, ‘Ning ngateihaolu, kala nathumwui morei pheomi khavai Jishu Khristawui ming singda nathum kachiva rahikhao-lu, chithaakha mangla katharawui lemnet chi nathumna samphangpaira*” (Otsak 2:38).

Para hiwui haokaphokli nana khi tamkhuikhala? Prohona huimikahaibingli churchli ngarumsanga kajiwui pongli kathei samphanghaira. Chiwui kakhalat chiya, kachikatha akhana paokaphawui kahang nganada rakahik

chitharan mi chili huikhami eina ngashada churchli ngarumsang kahaina. Ithumna theihaira khamashunga tui kasha, tui chili shitkasang, moreiwui eina ningkhangatei, Khristali hangkaphat, kala rakahik hibing hiwui manga eina huimiya da. Chi takam eina hangkahai hibing hi kasabingli Prohona churchli ngarumkasangna.

Churchli wungzangkapai apong khangatei akha china khikhala jila, chiwui pongli Prohona hithada hanga kaja kachithana tara eina kala mangla eina kaphara maningakha Varewui wungramli mazangramara da (John 3:3-5). Kha wungram chi khikhala? Wungram chi churchna (Matthew 16:18, 19). Chithakha Churchli apong khani eina zangkapaila? Maningphut mana. Kachikatha mi akhana shitsangda rakahik chitharan khamashunga tui chiwui manga eina mangla kala tara eina Varewui wungram kaja Prohowui churchli pharasang kahaina.

Latluida, Paulna hithada hanga kaja mangla akhamangna ithum saikorali phasa akhali rahiksangmiya da (1 Corinthnao 12:13). Phasa chi khikhala? Chi churchna (Colossiano 1:18). Phasa kayakha? Akhamanga (Ephesiano 4:4; Ephesiano 1:22,23). Chili kathada zangra? Rakahik manga eina. Khristana hanga shitsangda rakahik bingli huimirada (Mark 16:16). Khristana kahang chi Corinthianaobingna saya kala kahui samphanga (Otsak 18:8) chithada sada mi akhali churchli rahikkasang chitharan a hi churchwui akai akha ngasada ali chilli ngarumsang kahaina.

Ithumna theikahai chithada huimikhavai apong akhamang leiya kala huimikahaibingli Prohona churchli ngarumsanga. Na hi bibleli kapa samkaphang church chiwui memberla? Maningasaakha na huikhami masamphangranga. Ngathingyanglu, palu kala machuklu, Prohona kahang chi nganalu, chithaakha Proho akhalattana nali Awui churchli ngarumsangmira.

Khangahan Bing

Mashungda ngahankalu:

1. Tamngarum kahai hili churchwui pongli khi theikakhui samphang khala?
2. Churchwui vang khi pana thimikhala?
3. Church hi khi eina lokhui khala?
4. Churchwui huikhame chi khi pakhala?
5. Church hi khamataiya akhana da kathada theikhui khala?
6. Khiwui vang mi kaikhana churchli khamataiya sada makhuitha khala?
7. Churchna huimila?
8. Huimikahai mi akha sada church member ngasaphalungrala?
9. Tara kaphongwui eina kahui samphang khavai Noah kala awui shimkhur

kali kapam darka sakhalā?

10. Marikhong ayarli kankhavai apong maleikhala?

11. Huimikahai bingli khipana churchli ngarumsang khala?

12. Hiwui pongli khi bible tuizali kapihai khala?

13. Huimikahai mi chi khi churchwui member ngasakhala?

14. Mi akhana Prohowui church aningsak eina zangpaila?

15. Prohowui churchli zangkhavai pheikar phanga chi khimamei khala?

16. Pheikar phanga chili kasokahai bingwui kahang manganala kahui sam-phangpai rala?

17. Rakahik hi khi khala?

18. Rakahikawui khamataiya/kharin chi khikhala?

19. Wungram chi khikhala?

20. Wungramli zangkapai akhamang kaji apong chi kathada leikhala?

21. Phasa chi khikhala?

22. Phasa kayakha lei khala?

23. Mi akhana chili kathada zangra?

24. Huimikhavai apong kayakha leikhala?

25. Churchli zangkhavai apong kayakha leikhala?

KATAM CHISHAT CHURCHWUI KHOKHARUM

Church hi huimikahai bing eina sakakana. Chiwui kharin chi khikha-la jila Khristawui mingli Vareli khorum khavai kala otramngathakhavaina. “*kala nathumna ot kasali nilala, tui khamatuili nilala, Ava Vareli ningkashi mida atsak kachivali Proho Jishuwui ming eina salu*” (Colossianao 3:17).

Kadhara Tuingashit lairikli khokharum ayur kathumwui pongli kapi-hai. Khareyali, khipali khorumda khalei khala kaji matheila khokharumwui pongli kapa samphanga. Thangkha Paulna Athensli khalei Mar wui Kaphungnaoli yaokhava chitharan chili meoma kachungkha khalei ana thei kala saikora chi ana munlak eina yanga kala hithada hanga, “*Kaja ina nathumwui keinungli yaoung yaovalaga nathumna khorum khavai pamli khayang eina hangphut-pam akhali ‘MAKATHEIYA VAREILI’ da kapi kahai samphanga. Chieina nathumna khorumda khalei makatheia chi ina nathumli arui hangchitheida khalei hina*” (Otsak 17:23). Atam chitharanwui makatheiya vareli khokharum bing chithada ajala chikatha mi kachungkha leiya. Mi thingthingna khuktizangda meomali khokharum mang maningla chili chungkhamei mi thingkha katha thingkha-na Kathara Varewui tuili khi kapihaikhala kaji matheila okathuiwui dharma ayur zatzat khalei chili shurzatta.

Kakhaneyali, Prohona Arema eina khokharum wui pongli hangkahai leiya. Khristana hanga, “*Arema eina ili athumna khoruma, mikumona semkakhui ain chi iwui ainna da tamchithe*” (Matthew 15:9). Ajala mi chungkhameina Vareli arema eina khoruma. Athumla Proholi khorumda khaleina, chi mashunga, kha Varewui kaphaning eina makhorumla mikumona sakakhui ngashan kala tamkachithe athishurda khoruma. Chikatha khokharum chili Khristana arema eina khokharum da hoi.

Kakathumali, katharatuili Mangla kala khamashung eina khokharum kajiwui ponglila kapa samphanga. Khristana hithada hanga, “*Vare hiya manglana, chieina ali khokharumbingna mangla kala khamashung eina khorumphalungra*” (John 4:24). Varena khuisangmiki kaji khokharum ayur chimanga. Khristawui atamlila kala aja ithumwui atamlila chi khamashunga khokharumna. Khokharum hi Varena chijakhami athishurda mangla eina (kaja malungkhanim kala theishingkakhui) kala khamashung eina (kapikahai athishurda) khorumki kajina. Varena khipalikhala ali khorumphalungra da danti masamana, kha ali khokharumbing ana chijakhami athishurda khorumphalungra. Chikatha khokharumli ana khuisangmi.

1. **Athum tamngarum khavai kazipngaruma:** Timothy nganui

lakhawui eina Varetui tamida rarkaka nao ngasasalala (2 Timothy 2:15) Pualna ali pao hakashoka yaronao akhali machinkhami thada katomkhami tui eina ngasoda machinmichinga. “*Varewui pao mashungrik eina tamkachitheia akha sada nawui otwui vang makhayakla Varewui miktali tongchaoda mayakhami samphangkhai salu*” (2 Timothy 2:15). Varewui tui mashungrik eina ngayartada tamkachitheia (rightly dividing the word of truth NKJV English Bible) hi vareshi saikorana sakhangayiya otna matailak eina khorum khavai kazip khangarum chitharan. Thot hi Varena awui naongarabingli awui kharina tuiwui manga eina khangahan/khamatui thotna. Otsak 20:7 li katharabingna khorum khavai kazipkhangarum chitharan Paulna tamchitheithaiya da kapihaidale. China tamkhami kala tamkhangarum hi khokharumwui khamataiya akai akhana kaje chitheimiya.

2. **Athum seiha sai:** Pentecost thang mibingna Prohowui kahang nganada Ali khuisang kahaiwui thili, “*Athumna paokazatbingwui tamkachitheilila, ngarumsakla, kala khamui shaikhangarum eina seiha kasalila ningtumlak eina sakruma*” (Otsak 2:42). Seiha kasa manga eina Prohowui mibingna kazingramli khalei Ava Varivarali khangahan samkaphangna. Khorumkhavai kazipngarum laga seiha masangarumsi kaja kathamarao? Chithada sada seiha kasa hila khokharumwui khamataiya akai akhana.

3. **Athum masot laa sai:** Paulna achinangarabingli hithada kapida hanga “*Nathum akha eina akha Laa lairikwui tui eina, masotlaawui tui eina Kathara Laa lairikwui tui eina chancham ngarokta, nathumwui wuklungli masotkhami eina ngasoda Proholi masotchikatlu*” (Ephesianao 5:19). Colossianao 3:16 eina Hebrewnao 13:15 la palu. Vareli laa eina masot khami hili ayur khani sada khaipaira, chiya, mikumowui morchawui eina kashok laakhon mang eina masot khami kala khongkhavai akap-akai shichinlaga masot khami. Prohona ningkachang chi kachikatha khala? Ana ningkachang chiya ithumwui morchawui eina kashok khon china. Ithum Vareli wuklung eina masotmiki kajina da Paulna hanga. Hangdakhalei tui chiwui athishurda Vareli masotkhamili khongkhavai akap-akai shikachin hi makhamayanada theipai. Khareli Vareshibing Vareli Laasak eina masotmiya. Kha zingum shakhawui thili mikumona Varena makhuisangmiki kaji, ana mamayakhami khongkhavai akap-akai kaja tingteila, sipu hikathatha hi ngarumsang mamanda chieina masotmiya. Hikatha khon eina Vareshibing Vareli masotmipai mana lah seihala masapai mana.

4. **Athum kazip khangarumli Prohowui phakachizat khuingaruma:** Otsak 20:7li hiwui pongli kapihaidalei. Khristali phaningkhaung sada khamui hina Awui Phasawui amaha sada kala tengkot,kaja drakhathei-

ra hina Awui asheewui amaha sada khuishai-khuimang khavai da Matthew 26:26-28 kala 1 Corinthiano 11 li tamchitheihaiya. Hi aja rashungda haptawui kharethang kachida saki kajina.

5. **Kachikat/khami:** Paulna Galatia kala Corinthli khalei achin-abingli kasoda hanga, “*Hapta kachivawui kharethang kachichawui mikashap chi phaishokhaolu, chithaakha I khara tharan mangashailui mara*” (1 Corinthiano 16:2), kala 2 Corinthiano 9:7 la palu.

Khareli Vareshibing haptawui kharethang kajida khorum khavai kazipngarumchinga (Otsak 20:7; 1 Corinthiano 16:2). Athumli hithada machinmiya “*Mi kaikhana kasa thada masala ithumva mamalaihaila kazipngarumchinga. Kala akha eina akha mataimei da kasatsang ngaroksa kaja Prohowui zimiksho chi ranganaihaira kaji nathumna mikeina thei*” (Hebrewnao 10:25). Ajawui Vareshibingla ngaraikacha zimiksho chili khorumphalungra chithada kasa eina Varewui ngaraikacha machinkhame tui ithumla leipaira. Churchwui khokharum hiya shampat haiya kala horzak-tazak haiya. Chiwuiwang mi kachungkha pairekta pheingaphoka. Athumna phananga kaja khokharum hi sangphalungra, ngashanwui zatkhana kha ngarumsangra, kala khokharum kachidali zatna khavai rian/ain akha sakhuida mangacheikapai thada saya kala sakahai seihala latluilatlua saya. Kha kachangkhat khokharumva chi maning mana. Varena ali khokharumbingna kathada khorumra khala kaji ithumli chitheimihaira, chi mikumo ithumna teomeikhala ngacheikapai maning mana. Chili khangarumla mangarumsangpai mana lah khuikashokla makhuishokpai mana kaja chili Varewui khonshat lei. Varena matui kahaina mikumona kahang nganara. Chithada ali khorumpaira, masotmipaira, kala khaya mipaira.

Khangahan Bing

Mashungda ngahankamilu:

1. Church hi khi eina saka khala?
2. Churchwui kharin kala khamataiya chi khikhala?
3. Prohowui mingli khi salu jikhala?
4. Kadhara Tuingashit lairikli khokharum ayur kayakhawui pongli kapa samphang khala?
5. Paulna meoma kachungkha kathei samkaphang chi khi apamli khala?
6. Athumwui khokharumwui pongli Paulna khi hangkhala?
7. Ajala okathuili athumwui khokharum thada khorumda khalei mi Leila?
8. Khipana athum arema eina Vareli khoruma da hangkhala?

9. Khiwui vang athumwui khokharum aremana jikhala?
10. Aremawui khokharum wui pongli kapikahai Kathara tuiza bing milu
11. Ajala okathuili arema eina khorumda khalei mi kaikha leifala?
12. Khamashunga khokharum chi khikhala?
13. John 4:24li khi hanghai dalei khala kapilu
14. Vareli mangla eina khokharum kajiwui kakhalat khikhala?
15. Vareli khamashung eina khokharum kajiwui kakhalat khikhala?
16. Mikumoli Varena sangasak khangai khokharum chi kachikatha khokharum khala?
17. Prohowui mibingna hithada khorumra kajiwui pongli kali kapa samphang khala?
18. Khokharumli kazang akai phanga chi khi mamei khala?
19. Aja thotli Varena Mikumoli kathada kala khiwui manga eina matui khala?
20. Varewui naongarabingna Vareli kathada ngahan khala?
21. Laasak eina masot khami ayur khani sada khaiya chi khi mamei khala?
22. Varena ningkachang masotkhami ayur chi khikhala?
23. Prohowui phakachizat khikhala?
24. Haptawui khi zimiksholi Vareshibing kazipngarum khala?
25. Varena hithada khorumlu da hangkahai chili ngarumsangpai rala, kala khuishokpai rala?

KATAM CHIKO CHURCHWUI OTNGARUT

Khiwui vang church khalei khala? Churchwui kharin khikhala? Churchwui otngarut khikhala? Hibing hi phashok khavai Varewui tuili zangsa.

Rimeithuida, ithumna machukyangsa kaja church hiya okathuiwui oti akachang sada masathuihaipai mana. Churchna worshim (school) kala Arishang (hospital) katha lingka laga leih masamana lah pheisa pheikhavai lairik kapishokda khayor hikathathawui oti masamana. Hangkahai otsin saikora hi mamathamana majimana, kha Varena churchli sangasak khangaiwa chi maningmana. Kachikatha Vareshi akhana sangaikha sapai kala kasala sapapamdalei. Mataimei da aja dharma khalei okathui hi hikatha ot kasali ningsangmei haowa. Chithada athumli Bibleli kapikahai Varena awui mibingli sangasak khangai kharin kala otngarut wui eina tathuikhangai tathuingasak haowa.

1. **Paokapha Hakashok:** Khrista kathiwi eina ringlui kahaiwui thili kala kazingram makarang laga atamli ana paokazatbingli hithada tamida hanga “*Chiwui vang eina nathumna vada miyur saikorali iwui sakhangatha sangasaklu; athumli Ava kala Anaomayara kala Mangla Katharawui ming singda rahikmilu, kala ina nathumli kaso kahai saikora mayon khavai athumli tamchitheilu, kala mithot khangachang eina tangda ina nathumli ngasomichingra*” (Matthew 28:19, 20). “*Ana hanga, ‘okathui apam katongali valu kala miyur saikorali paokapha hi hashoklu. Shitsangda rahikahai mi chili huimira; kha mashitkasanga mi chili khayon mira*” (Mark 16:15,16). Naoda Paulna Timothyli hithada kapida hanga, “*Tui chi hashoklu, kumkashok kumkashang mayangalu, theikhui ngasaklu, machinlu, katomlu, ningzingharingda tamkachithei machokchaihailu*” (2 Timothy 4:2). Khangatei kathara tuiza bing kaikhala mipai kha hinala Prohona ithumli paokapha hashokngasakngayai kaji theikhuingasakshap haira.

Paokazatbingwui atamli churchna khi ot sakhal? Prohona salu da kaso chi sai, kala paokapha hashoka. Otsak lairik hi khudam akhana kaja chili paokapha hakashokwui pongli kachungkha kapihaidalei. Lairik chili rahikhamiwui/ vareshi onkhangasak (conversion) wui pongli kachungkhashida kapihai kala chiwui pongli kapa samkaphang kachidali pao hakashoka china paokapha hashokhami kala tamkhamiwui ponglila kapa samphangchinga. Athum atam kachida paokapha hashok khavai ngarankharik kahai leiya. Otsak kapikasang 2,8,9,10, kala 16 hibing palu. Kha, khipana tamkhami kala paokapha hakashokwui ot sakhal? Jerusalemlu khalei churchli kachot-kachang khamiwui vang athum ngaphayang haowa, kala athumwui pongli hithada kapihai dalei, “*Chitharan ngapha kahaibing china paokapha tamchithei*” (Otsak 8:4).

Mathangli, athumna khiwui pongli hakashok khala? Latluida Otsak lairikli kazang rahikhamiwui kharachan katonga palu chithaakha nakhalatana theikhuipaira. Kha hilila shameikha hangmingai, athumna khi tamikhala jila, Jishu hi Khristana kala Varena, Huikhami samphang khavai khi sara, churchwui khamataiya khikhala kajiwiwui pongli, Kathada khorumra, Vareshi akha khangasawui aman kasak hkt. wui pongli tamchitheiya. Hangkahai saikora chili kasha tui eina Paulna “Khrush wui Tui” da hoi, “*Kaja shimanda khalei athumwui vanga Khrustwui tui hi mangkhama thai, huimida khalei ithumwui vanga Varewui pangshapna*” (1 Corinthnao 1:18).

Prohona awui tui hashok khavai kakaso chimang majila, Paulna la hithada hanga kaja, Prohowui tui kasha eina shitkasang shoka (Romenao 10:17). Khristanala hithada hangluiya, “*Nathumna khamashung chi theikhuira kala khamashung china nathumli ningkhanmira*” (John 8:32). Latluida hanga “*Kha athumna ali mashitsangakha kathada ngakaopaira khala? Kala athumna paochi mashaakha kathada shitsangra khala? Kala pao chi mahashokakha athumna kathada sharakhala?*” (Romenao 10:14). Hangda khalei saikora hiwui kakhalat chiya khikhala jila, Ithum miku-mo saikora shimandalei kaji kachitheina (Romenao 3:23; 6:23). Chithada sada mikumoli huimikhavai huikhame leiya kajiwiwui kachihan kala kachithei sada athumwuivang Paokapha hi hashokmi phalungra (Romenao 5:8; John 3:16), chithada kasa eina morei kaphunga china Varewui paokapha chiwui kahang khangana manga eina moreiwui eina kahui samphangpairo (Romenao 1:16,17; Mark 16:15,16). Varewui kaphaning ningkachang khikhala da matheikhami kala chiwui kahang makhangana bing kashiman ngasara (2 Thessalonianao 1:7-9). Chiwuiwang eina Varewui tui hashokphalungra.

2. **Kachamnao bingli khangachon:** Prohowui tuili Churchna kachamnao bingwui vang phaningkhami kala ngachonkhami wui pongli chithei kahai lei. Otsak 2:45 li hithada kapa samphanga “*Athumwui khalalei lan, thongthang saikora yorhaida kachikatha khavatabing saikorali ngayarmi.*” Hi danti eina kasa maningmana kha kachichawui ningkatong eina kasana. Kha latluida Otsak kapikasang tharukli hithada kapa samphanga kaja Greek khamatui Jihudinaobing eina Aramaic khamatui Jihudinaobing wui ngachaili ngaphat-ngayat rashoka. Khiwuiwang khala jila Greek khamatui Jihudibingwui rameinaobingli athumwui thangthangwui khavat mathada mayangsang khamiwuiwang. Chiwui vang eina Paokazatbingna sakhangatha saikorali hokhuida kazipngaruma kala athumwui ngachaiwui eina hikatha otshotli yangsangmi khavai manglana kapem mi shine kapangsanga.

Paulna Jerusalemla khalei churchwui kachamnaobingli samphang khavai khavawui pongli kapa samphanga. Ana hithada hangchinga chiya “*Kaja*

Achaia eina Macedoniali khalei churchbingna Jerusalemli khalei kachama katharabingli haolak eina pheisa ngachonmira chihaira” (Romenao 15:26). Chithada sada Paulna Corinthli khalei churchlila hithada kapida hanga, “*Judeali khalei katharabingli ngachon khavai pheisa khangashaiwui pongli iwui ngahankaka hina; ina Galatiaiwui church bingli kaso kahai chithada nathumla salu. Hapta kachivawui kharethang kachichawui mikashap chi phaishokhaolu, chithakha I khara chitharan mangashailui mara*” (1 Corinthnao 16:1,2).

Kachikatha mili ngachonra khala? Hiya thada theiserkahaina kaja churchwui lungli khavat khalei bingli ngachonmiya kaji hi. Kha matailak eina kachamnaobing, kasar-kafabing, rameinaobing, maranaobing kala kachikathana kasuirak eina kalashatli tazangkahai athumli ngachonmira. Hithada kapihaiya, “*Chiwui vang eina ithumna sapaida leilakha mi saikorali kapha samisersa, mataimeikapta shitkasang khangarumabingli samisa*” (Galatianao 6:10). Thada mi saikorali ngachonmiphaphaki kaji maning mana. 1 Timothy 5li kapikahai ithumna thei kaja khalatali mangachon kharar, ngachomi khavai shimkhur chinaongara makhalei kala vareshi akha sada shitkasang kathuka mi, chikatha mili toilak eina ngachonmiya. Prohowui pheisa/ lan hi kapopoli thada mikhavai maningmana kha maram chalak eina kala mi khai laga miki kajina.

Church memberbing mangli maningla kha khangachon samphangran bingli churchna ngachonkapai apong eina ngachonra (James 1:27 kala James 2). Hila mibingli paokapha vashungmi khavaiwui apong akhana.

Kha hikatha ot sakhavai lan kachiwui eina samphang khala? Churchwui lan hi mingaireoreo eina khami, shitkasang kathuka church memberbingwui eina kharana (1 Corinthnao 16:1,2; 2 Corinthnao 9:6,7). Chiwui kakhalat chiya, Vareshi akha sada khami kaho maleiakha churchna khavatbingli ngachonmi khavai apong maleimana kajina.

3. Church reisang khangasak: Church reisangkhangasak kajiwui kakhalat chiya sakaka, malingmei khavai kasa, katomkhami, kala memberbingli manglarin eina rarkakhavai ngachonkhami hikathathali kahangna. Khina reisang ngasak khala? Varewui tui, ngarumsak khalei, khokharumli khamataiya sada kakhui, ngachonmi khangarok, kapha kasa, leikashi hkt. hina churchli reikasang khuiramiya. Otsak 9:31; Romenao 14:9, 1 Corinthnao 8:1; 1 Thessalonicanao 5:11; 1 Corinthnao 14:26; 2 Corinthnao 12:19; Ephesianao 4:12 hibing palu.

Khanaowali hithada hanghai kaja, mi kachungkhana phaningsapai kaja local church saikorana khangaruma longna akha maleiakha, churchwui akuia sakhavai mi akhali makapangkaakha, kala churchwui lansinrinli mathasang khavai leihsakwui otsin masingkaakha kathada hangkahai otngarutbing hi

churchna sashapra khala da. Kha Prohowui otmanga khuikhavai Ana hitha-da salu da mikahai apong china phameithuiya. Ithumna Varewui kaphaning kasa eina ali tekmatei ngasaka, khayala kangasaka kala masotla samphang ngasaka chithada sada Ana ithumli kashemwui kharin wungshungasaka. Khris-ta hi churchwui akuiana, local church kachivawui akuiala ana, kala member kachivawui akuiala ana, Church mipha kachiva churchwui otngarut kakhuili ichichawui saran leiya. Chithada sada church mipha avavana kachichawui sa-ran kasa eina church ahangvana otngarutbing hi sakashapna.

Paokapha hakashok, Khavat-khangazana bingli khangachon, church reisangkavai kasa, saikora hi shimanda khalei mangla huikhui khavai wuiv-ang kasasera. Chithada sada khanaowali china Varewui mingli tekkhamate ngasara. Hi maningla churchna sakhavai ot khangatei malei mana. Leihsak kala Churchli longnao onkhangasak hi Bibleli makazang otsakna. Prohowui church hiya manglarinwui phasana, okathuili leilala okathuiwui maningma-na. Church hiya Varewui kahang nganakhavai, kala mikumoli otramngath-akhavai, kashenga kala kathara ngasada leiching khavai saya kala churchwui mipha kachivawui huikhami kala chiwui kasaakhavawui tekhamatei li lung-sangda phaya. Hi Prohowui churchna; kala chiwui kharin kala otngarutna.

Khangahan Bing

Mashungda ngahankamilu:

1. Prohowui churchna kachikatha ot masama khala?
2. Dharma khalei okathui hina tongkhuikhavai otmanga kachungkha kasa wuivang yonhaola?
3. Churchwui otngarut khimamei khala?
4. Matthew 28:19,20 kala Mark 16:16 li kapi kahai Prohowui kakaso tui chi kapilu.
5. Rekkakharekwui vang ngaphayang kahai chitharan kharewui vareishib-ingna khi sakhala?
6. Athumna hakashok chi khikhala?
7. Shitkasang kathada shok khala?
8. Ithumli khina ningkhanmi khala?
9. Mikumoli kathada huikhui paira?
10. Kachikatha mina kashiman ngasara khala?
11. Khavat-khangazan bingli churchna maphaningmi khala?
12. Jerusalemlu khalei vareshi kachamnao bingli khipana ngachonmi khala?
13. Mi katongkhali ngachonmiki kajila?

14. Rilak kachikatha mibingli ngachon ngayi khala?
15. Kachikatha mina khangachon khuingayi khala kajiwui pongli hanglu.
16. Churchwui member makhaningbingli lila ngachonpairala?
17. Khavat-khangazan bingli ngachonkhavai lan kachiwui eina rakhala?
18. Churchna khi apong eina lan phara?
19. Reisangkhangasak kajiwui kakhalat khikhala hanglu.
20. Khina reisangasak khala?
21. Vareli kathada kala khi kasa eina masot kala khaya mipaira khala?
22. Churchwui akuia chi khipa khala?
23. Churchwui otngarut bingwui kharin chi khikhala?
24. Church hi okathuiwuila?
25. Leihsak kala churchli longnao onkhangasak hi khili mazangmana jikhala?

KATAM THARA CHURCHWUI KHOKKHA

Dharmarin khalei ajawui okathui church khokkha sakhavai wuivang khamachuk kala hotkhana hi khare atamli langmeida ajawui thotli ning-sangmeiya. Shitkasang ngateingarok salala otsakrumda khangshik nganai-me khavai hotkhanawui ningai hi mipha saikorawui ningli leihaira. Sada khalei kala hotnada khalei saikora hi khiwuivang khala jila dharmarinli kaikhangarok chungna da shokkhai wuivangna kala mi saikora chiwuivang chothgarokser kahai wuivangna. Kha, okathuili khalei mikumowui dharma saikora ngarumda athum akha eina akha mamayangaroksa da maya khangarok china khokkha makhuirararmara. Athumwui ngachaili mayangarok kapai apong kaikha leisalapai kha kaikhangarok kala mamaya khangarok hi leiching haowa. Chi khiwuivang khala theila? Khiwuivang khala kaji hi Bibleli zangser dalei. Mikumo bingwui ngachaili kachangkhat khamashung khokkha leirano chiakha athum saikora kachichawui tamkachithei, aming-bing, churchbing, mikumona shemkakhui ainwui lairik, hkt., bing hi haita phalungra kala bible harkhuida para, machukra, shitsangra kala chiwui kahang ngara. Chithada kasa eina Jishuna John 17li khokkha sarano da seiha sami kahai chikatha khamashungwui khokkha athumwui ngachaili leipaira. Chithasi kaja athum saikora ngaraikacha ot akhali shitsangra, ngaraikacha tamkachithei akhawui kahang nganara, Varetui athishurda mikahai ming-pho akha eina hoserra, saikora otsakrumra, ngaraikacha tamkachithei tamchitheira, kala kazingramlila kangarumra. Mikumona mikumoli mashurluila Khristali shurphok haosi kaja mikumowui ngachaili khokkha kasa khuirakhavai masakna mara.

Ngakai-ngakak khangarok hili kathara varetuina khayon mida mamaya mana. Bibleli hithada hanga kaja achinangarabingwui ngachaili kaikhanga-rok kala mamaya khangarokwui atha yaokazatbingli Varena ningkachai da (Chansam 6:19). Corinthli khalei churchwui lungli kaikhangarok rakashokwui pongli ithumna khare Corinthianaowui lairik kapikasang akhali kapa samphang haira. Chikatha otshotwuivang Paulna makahao mana, kha chi rashok khavai angayung chi sashiman khavai ngalangda pheikar khuiphok haowa, kala ana hithada kapida hanga, *“Ivanaongara, Proho Jishu Khristawui ming singda nathumli kapon, nathum maya ngaroklu, makaingarokalu; kaphaning kala kharin akhamang leilaga khokkha sachaolu”* (1 Corinthnao 1:10). Athumwui makhamashung otsak chitheimi khavai Paulna khangahan kathum ngahan-na, chi bing chia: Khristali ngakaipairala? Nathumwui vang Paulli khrustung-

li shaothatla? Nathumli Paulwui ming singda rahikmila? Khangahan kathum hiwui ngahankaka chia ‘maning mana’ jira. Chithada ana kaikhangarok hi mamashungmana da chitheimi.

Ngaraikacha paokazata Paulna Romeli khalei achinangara bingli hithada kapida hangluishita, “*Ivanaongara, ina pokhangai hina, sakakhayangbingli kala nathumli tamchithei kahai chi mashurla khangatei tamchitheida shitkasang mashongachei ngasakda khalei mibing chili ningasharlu. Athumli mangasoalu. Kaja hithada kasa athum chiya Khristawui otramkhangatha maningla paiphonwui vang ot kasana, athumwui kashim tui kala sotkhamasao akhon eina matheithangkameibingli yonngasaka*” (Romenao 16:17,18). Colossianao 2:20-22 li ana hithada hanga, “*Nathum Khristali thihaira kala apug-apagali khamunga manglabingwui pangshap eina ningkhanhaira. Chithaakha khiwuiwang nathumna masakhangayi ot sada khaleikhala? Kala khisada hikatha ainbing “hi masazalu”, “hi mamazapalu”, “Hi masingalu” kaji hi mayahao khala? Hikatha hiya shichin kahaiwui thili shimanhaoki kaji mikumona shemkakhuiya ayin kala tamkachithei-maya.*”

Hangda khalei saikorawui kakhalat chiya, mikumowui tamkachithei, kala kakaso; kala mikumoli khangkada masotkhami, kala Bible maningla khangatei mikumona kakapi lairik wui tuili kashur kala khamaya hkt., hina kaikhangarok kala mamaya khangarok khuikharana kajina. Kha khokkha kasa hiya Khristali kashur hina khuiramipai. Khristana hithada seiha sai, “*Ina hibingwui vangmang seiha kasa maningmana, kha athumwui tui shada ili shitkasanga athumwuiwang seiha kasana, chiya athum akha sapaira; Ava nana iwuili, kala ina nawuili khalei thada, athum iniwuili leiranu, chithaakha apug-apagavana nana ili kashiratna kaji shitsangra*” (John 17:20,21). Ara nana machukyanglu kaja, Khristana masa-paiphalongki kaji ot wuiwang seiha sarala? Maningphut mana. Chithakha khokkha hi leipai. Katharan? Ithum Khristali kashur chitharan. Mikumowui tamkachithei china ithumli kaingasakra, kha Biblewui tamkachithei china ithumli akha ngasangasakra.

Ephesianao 4:1-6li khokkha kasawui pongli hangchithei kahai lei, chi khikhala nganayangsa “*chiwuiwang eina Prohowui vang narkahaia ina kapon kaja nathumli hokakhui tharan Varena ngaranmi kahai mirin chi tazakta okthui khavai ngaranlu. Atam kachivali ngahuilu, takuihailu kala ningzingharinghailu. Akha eina akha khangmi ngarokta nathumwui leukashi chitheilu. Makaikapai chingri kahai chieina ngasoda manglana khami ningkha kasa chi leiching khavai ngaranlu. Varena nathumli hokakhui chili kachihan akhamang kaji thada phasa akhamanga kala mangla akhamanga. Prohola akha, shitkasangla akha, kala rakahikla akhamanga. Vare akha, kala mikumo saikorawui Avava akhamanga, a saikorawui Prohona, saikorawui atungli saikorawui manga eina saikorawui atungli lei.*” Theilu kaja hi khokkha sakhavai wuiwang kapo tuina.

Kala hila theilu kaja hangta kahai bing hiwui ngachaili akhali khalang ot akhala mazang mana. Kachikatha mi akhana hangta kahai bing hi akhali langsera da phaningkhui kahai zangsarala?

Churchwui khokkha hilila theikhuipai, kaja Khristana hithada hanga ana awui church sakara da (Matthew 16:18) chiwui kakhalatva akhamanga da theikhuipai kala chi manglarin eina Khristawui phasana (1 Corinthnao 12:27), a chiwui akuiana (Colossianao 1:18). Kachangkhat eina kahangna kaja khipanakhala Khristali akui khani kala phasa khani leiya da maphen-rarlak mara. Church hi Varewui shim maningakha Varewui shimkhur dala theivaiya. (1 Timothy 3:15). Kha shim kayakha kala shimkhur kayakha khala? Akhamanga. Khristana awunga ngasada kapanna awui wungram kala Varewui wungram wui pongli kapa samphanga (John 3:3-5; Colossianao 4:11; 1 Timothy 6:15). Prohowui wungram kayakha leikhala kala chili awunga kayakha leikhala? Wungram akhamang kaji thada awungala akhamanga.

Shitkasang kala theikakhui ngatei khangarokwui vang mamaya ngarokmada church kachungkha khalei hi Biblena mamaya mana khiwuivang kala jila chi kaikhangarokna. Kha Biblena khokkha kasa, akha khangasa, mapungkapha, kala angum akha kajiwui pongli chitheimiya. Bibleli church hi dharmarin khalei mi, athumwui shitkasang kala otsak ngateikhangarok makhaila saikora akhanada mayakhangarokwui lungli sakaka phasa akha thada machitheihai mana. Kha hithada chitheihaiya, chiya, church hi khristawuina, hoshokkahai bing eina sakaka phasana, Khristawui thikashurabing, awui tamkachitheili kahang khangnabing kala huimikahai bingna. Khristali mangakaipai mana chithada awui churchla mangakaipai mana. Kaikhangarok kala chili kakatom hi Khristali khangashungna kala Ana khokkha sakhavai da seiha kasa chili khayetna.

Khangahan Bing

Mashungda ngahanka milu:

1. Church khokkha sakhavai wuivang da khangakao leila aja?
2. Khi maramwuivang khokkha sakhavai hiyakha ningsangda khalei khala?
3. Okathuili khalei dharma saikora ngarumda mamayangarok khavai mayakhangarok china khokkha kasa khuirapairala?
4. Khokkha kasa hi kathada khuirapaira khala?
5. Khokkha sakhavai mikumona khi hortangarokra khala?
6. Ithum saikora akha ngasapai khavai vang khipana seiha sakhala?
7. Khokkha sasi kaja mikumowui ngachaili khi leira khala?

8. Kathara tuina ngakaikhangarok otsakli khayon mami khala?
9. Prohona kachikatha mili ningkachai khala?
10. 1 Corinthianao 1:10 kapilu.
11. Paulna Corinth li khalei churchli khangahan kathum chi khimamei khala?
12. Kachikatha mibingli machuthaisalu chi khala?
13. Athum khipali otramngatha khala?
14. Ithum chikatha mili mangaso marala?
15. Proholi arema eina khokharumbing chi khapalong khala?
16. Khristana kachikatha maramwuivang seiha sakhalala?
17. Ana masapaiki kaji ot wuivang seiha sala?
18. Ephesianao lairikli khokkha wui pongli kapikahai chi khikhala? Kapilu.
19. Chili kapikahai avava chi mashing kayaya khala?
20. Khristana church kayakha sakakhala?
21. Church hi khikhala?
22. Churchwui akuia chi khipa khala?
23. Khrista hi phasa kala akui avavali langmei da leila?
24. Prohowui shimkhur kayakha leikhala?
25. Varewui tuina ithumli kaingasakraka maningkha khokkha sangasakra khala?

KATAM THARADA-AKHA CHURCHWUI SHITKASANG (CREED)

‘Creed’ kaji tui hi Latin tuili ‘Credo’ kaji tuiyarwui eina kharana, chiwui kakhalat chiya ‘shitkasang’ kajina. Shitkasang phongkashok tui, maningakha kasha eina dharma akhawui shitkasangwui pongli pheisin salaga kapikahai shiyanchikan wui lairik chili ‘creed’ da hoi. Kachikatha akhana shitkasang (creed) kajiwui pongli khamachuk chitharan Paokazatbingwui Shitkasang (apostle creed) kala Nicene wui shitkasang (Nicene Creed), khani hi matailak phaningungdaleira. Kha thalala khanini wui pongli Bibleli kapikahai malei-mana. Langmeida, mikumona sakaka church kachiva mikumona semkakhui shitkasang, machinkhami, shiyan-chikan kala shitkasang phongkashok wui lairik hkt., leiya. Saikora hi Varewui kathara tuili ngarumkasangserra.

Bibleli kapikahaili mataimeida kazang shitkasangwui lairik chi henna kahaina da hangpai. Kala chi takam eina Bibleli kazang chili suitameida kazang shikasangwui lairik chi suitanalui kahaina. Kala kalikhada shikasangwui lairik akhali Bibleli kazang horzakda, suikatala masuita kala khalangla mangsangma chiakha, chila makankhanana, kaja chi bible eina horzak haoda chi masashokluilala Biblehi pangli leichingkahaina. Phongkhami 22:18,19; Galatiano 1:6-9 athishurda Varewui tuili ngarumkasangla mangarumsangpai mana, khuikashokla makhuishokpai mana kala chiwui mathun sada kashin-la mashinsangpai mana. Khangatei apong eina hangsa chiakha, Vareitui hiya kuplak, peilakahai kahai, khavat maleilui kaji tuina (completeness) (2 Timothy 3:16,17), Varewui tui hiya mapungphalak kahai tuina (James 1:25), kala ithum pao hakashoka china Varewui pao hashokphalungra (1 Peter 4:11). Chiwuivang eina Varewui tuili ngarumsang khavai lairik khangatei akha darka masalui mana.

Aja okathui kaingarok haira, chi mibingna Varewui tuili kashurwui-ang maningmana kha mikumona shemkakhui shitkasang chi khuikasanguwivangna. Church kachiva kachichashiwui shiyan-chikan, kala ayin ngavaphalungra da ngaphat-ngayeta. China khi chitheimikhala jila mikumona Bible hortahaira kaji tharlak eina chitheimiya. Chi kayakha khangachee kala wukakhanang ot khala? Chithada sada, mikumona shemkakhui lairik bing hortaserhailaga Varewui tui kaja Bibleli hanungser haosa kaji hi mi kachivali ithumwui khangakao khonna. China ithumli makaingasak mara kha Khristawui lungli khokkha sangasakra.

Prohowui churchwui shitkasang khikhala? Ithumva Khrista maningla Huikhame khangatei akha maleilui mana kala Bible hi maningla khangatei

shitkasangwui lairik maleilui mana. Dharmawui lungli ithumwui theikakhui kala chukhamaja hiya makankhanana. Ithum khalattawui Biblewui tui kahan (bible interpretation) mangava mana. Ithumwui khalei chiya Bible himana katei maleilui mana. Ithum Biblena khi tamikhala chiwui kahang nganai, kala mibinglila chi sakhavai hangmiya. Chi palu, tamkhuilu, kala chiwui kahang nganalu, hi ithumwui seihana (John 5:39; 2 Timothy 2:15), okathui hupvali khalei mipha kachivalila hi kahangna kaja Biblena khi tamikhala chi salu.

Ithumna shurda khalei khangatei lairik akha maleiluimana. Bibleli ngaraida shiyan-chikan/yanza wui lairik kapishapki kaji mi okathuili leisara da mashit- sang mana. Prohona chikatha lairik kapi khavai kachikatha akhali mashun mihaisara kajila mashitsangmana. Chikatha lairik kapikhavai mangla katha- rana kachikatha akhali kasatmihairasara kajila mashitsang mana.

Hi Varewui tuina, Varewui eina khara hi varetui maningla khangatei malei mana, kala chi Varena kasatkhami tuina, kala china ithumli huimishapa. Langmeida chi khanaowa zimiksholi ithumli bichar saki kaji Varewui tuina (John 12:48). Khamshung phalala masamphang mara khamashung haophok khavai pamli maphaakha. Chithada sada khamashungli shitsangra jiakha khamashung tui kasha samphangphalungra (Romenao 10:17). Dharmarinwui lungli mi chungkhameili thanguida khalei hili matakkhak khavai maleimana. Okathuiwui dharmarinwui lungli kaikhangarok kala pakhangapa kachungkha khalei hilila matakkhak khavai maleimana. Mikumona khangachon khuikhavai Prohowuili marala mikumowuili vai. Biblewui tamkachitheili manganala mikumona tamkachitheili nganaya. Kachangkhat eina kahangna kaja kachikathana huikhami samphangaiakha a Bibleli hanungphalungra.

Churchwui pongli khamashung tamkhuikhavai Bibleli hanunglu da ithumna mi kachivali katommidalei. Okathuili khangui kala, makhamashung churchkachungkhaleiya. Kachipanakhamashungchurchkhala? Khamashung chi kachipa khala da phashok khavai avava chi tamserala? Maning mana. Kha churchwui pongli khamashung hangmida khalei lairik chi (Bible) palu. Kachikatha mi akhana akhashi churchwui pongli khamashung theikhuihaosi kaja ana pailak eina Biblewui tamkhami athishurda khamshunga church chi kachipa khala da phakhuishapra.

Mikumona khi kasa eina huikhami samphangpaira khala kajiwui pongli khamashung tamkhuikhavai Bibleli hanunglu da ithumna mi kachivali katommidalei. Mikumowui tamkhami athishurdava huimikhavai apong kachungkha leiya, kha kachikatha akhana Varewui lairikli phaakha hithada samphangra, chiya, huikhami samphangkhavai khamashung tui kasha samphangphalungra, kasha chi shitsangphalungra, moreiwui eina ningateiph-

alungra, Khristali hangphatra, kala morei pheomikhavai rahikphalungra (Mark 16:15,16; Otsak 2:38). Huikhami samkaphangwui pongli mikumona kahang eina arui hangkahai hiwui khangatei maleikhala? Huimida khaleiya chi mikumo maningmana kha Khristana, chiwuiwang eina kahui samphang khavai awui tui shara kala chiwui kahang nganara.

Vareli kathada khorumra kajiwui pongli theikhui khavai ithum mi kachivali Bible pada chiwui eina tamkhui khavai katommiphalongra. Vareli kathada khorumra khala kajiwui pongli mikumona kahang eina ngateihang haiya, kaja Vareli khorumkapai apong kachungkha maleimana. Biblewui athishurda Vareli khorumkapai apong akhamanga, kala chi Prohona awui tuili rinsit eina kala tharlak eina hangmihaiya (John 4:24).

Hangkahai marambing hiwuiwang mang maningla kha khangatei kaja huikhami, kharinga mirin, kala Vareshirinli khangashik khalei maram saikorawui ponglila khamashung theikhui khavai mi kachivali Bible pakhavai kakasona. Mibingna Bible hi bhaptashilak kahai matheishingkhuiraki kaji thada khuiya, chiwuiwang ningkhamong maleilakla hangshappa kaja ithumwui bhaptakakhui eina mangarai thura kaji hi, kha chi mamashungmana. Mikumo akhawui mangla shimangasak khavai wuiwang ali Biblewui eina tathuikhangasak kaji hi makapha chipeewui otna. Kha kachikatha mi akhana huikhami samphangaiakha Bibleli zangra, chili shitsangra, chi akhamang kaji awui manglarinwui pongli thankhamiya thanme (guide) ngasangasak phalongra. Hithada kasa apong himang eina a kahui samphangpaira kaja ana mashung kapai apongla himanga.

Ithumwui shitkasang khikhala? Ithumwui shitkasang chiya Jishu Khrista kala Awui tui na. Chi maningla khangatei maleimana. Ithum Khrista hi Varewui naomayarana kala chithada sada Awui tui china khanaowana, awui tuili makanda machukhavai maleilui mana da shitsanga. Ithum Awui tui chili mayai kala tui chili maningla kateili mashurmana. Chi takam eina sakhavai mikhangateibinglila kasodalei. Mikumona sakakhui shitkasangwui tui china athumli apam kateili maningla kha meifali thanvara. Jishuna hanga, “...*I shongfana, khamashungana, kala kharingana; Iwui eina maningla Avawawuili khiapakha marapaimana*” (John 14:6).

Khangahan Bing

Mashungda ngahankalu:

1. Shitkasang (creed) kaji hi khikhala?
2. Mikumona sakakhui church kachiva khi leiser khala?

3. Varewui tuili ngarumkasang bing kala chiwui eina khuikashokbingli khi sara chikhala?
4. Kathara Varewui tui hi kashunglakla (kapei/ khavat maleilui kaji) (complete)?
5. Mapungkapha kaji hi khikhala?
6. Ithum khi hashokra?
7. Shitkasangwui lungli bible maningla khangatei lairik akha darka sarala?
8. Khiwuiwang eina aja okathui dharmarin wuiwang kaingarok khala?
9. Biblena ithumli kaingasakrala?
10. Prohowui churchwui shitkasang khikhala?
11. Ithum khalattawui kaphaning kala theikakhui hiwui kankhana leila?
12. Ithum khalattana kakhalat hankakhui (private interpretation) varetui leipaiya kajiwui mashun leila?
13. Bibleli ngaraida lairik kapikashap mi okathuili leisarala?
14. Kachikatha mi akhana lairik kapida, lairik chieina bible ngaraiya da phongkhavai Prohona ali mashun mihaila?
15. Prohowui tui kachiwui eina rakhala?
16. Khanaowa zimiksholi ithumli khi tui eina bichar sara khala?
17. Khamashung chi khikhala?
18. Mikumona khangachon khuikhavai khipawuili vakhala?
19. Churchwui pongli khamashung tamkhuikhavai kali vara khala?
20. Huimikhavai apong kachungkha leila?
21. Huikhami samphang khavai biblena khi salu da tamikhala?
22. Prohona mikumoli khokharumli sangasak khangai khikhala da chithei kahai leila?
23. Bible hi bhaptakapai lairikla?
24. Ithumwui bible bhapkata hi ngaraipaila?
25. Akhamang kaji kazingram vakapai shongfa chi khipa khala?

KATAM THARADA-KHANI CHURCHWUI THOTCHAN

Otsak lairikwui kapikasang khani hili Prohowui church kaja wungram sakakhavai kala haophok khavaiwui atam hi wungshungkahaina. Paokazatbing Jerusalemlu pamserdalei, mangla kathara athumwui tungli heirormi haira, miyur kachungkha Pentecost zimiksho wuivang chili rakazipngarumser dalei. Hi Joel maranna hangkahai tui wungkashungna da Peter kala paokazatbingna phongshokda hanga, Khrista thihaira chithada sada khanaowa zimikshobing chi haophok kahaina. Ningkhangatei kala morei pheokhamiwui pongli hashoka, mi thing-kathum shakha paokapha hakashok chi khuikasang wuivang rahikda Prohona athumli Awui Churchli ngarumsanga. Chithanghonwui eina paokapha Jerusalemwui eina hashokphokda Judea ngalei hupvali vashunga, Samarialila hashokda khanaowali okathui achikun mati vashungda kazingramwui azingli khalei, shemkahai yur saikorana paokapha chi masharanglaga eina tangda hashokmiya (Otsak 1:8; Matthew 28:19, 20; Mark 16:15,16; Colossianao 1:23).

Paokazatbingwui atamli church mathalak eina haksanga, kala thaklak eina mayasanga. Paul rahikda Vareshi ngasakahaiwui thili ana paokapha hakashokwui shongja khangakhui kathumshiya, Jehudinaobing wuivangmang maningla kha yur khangateibingwui vangla hashokmiya. Chiwui athei sada Prohowui church Asia kala Europewui apam kachungkhala shoka. Kha chi kapai ot maningmana kaja atam chitharan churchli zakshilak eina rekhareksai. Kharei sada churchli rekkakhaharek hi Jerusalemwui eina haophoka. China maram sada sakhangathabing apam katavali ngaphayang haowa chithada athumna vatakhavai apam kachivali paokapha hashoka (Otsak:1-4). Atamna thumimamanda Romenao bingna Vareshibingli maram kachungkha wuivang khayon phenda mi kachungkhali ngareo-ngahankhavaipamli (arena) tukzangda athumli rekkharek-khanganao kala danti khami china lumlao savaiya. Naoda Paulila phatopli sangda Romeli bichar sakhavai khamungabing, ayin kasingabingwuili khuivaya. Okathuiwui thotchannala hanga kaja John maningla khangatei Paokazatbing saikoralu Kristawui vang eina kachot-kachang mida sathathaowa da. Vareshi shakha, thingkha, kala thingkha katha thingkhana Khristawui vang okathuili athumwui mirin kashiman samphanga.

Hiyakha rekkharekdaleisalala churchva mangasamlakla haksanga kala mayasanga. Churchli hakmeithui kaji katek-kakai rakashok hi rekkakharekna maningmana, kha chi church khalattawui alungwui eina rakashokna. Paul-

na mashitkasangwui atam raki kajiwui pongli hangmaranhairasaya. Apong khangatei eina hangsa jiaakha ana hangda khalei hi Prohowui church memberbing khamshungwui eina khayon sakhavai mathuihaoki kaji zimiksho rara kajina. Kha ana hiwui pongli khi hanglak khala kaji yangsa: “*Ithumwui Prhoho Jishu Khrista latraluiki kaji kala ali ngasoda ithum kaziprumki kajiwui pongli iwanaobing nathumli kapona. Kaja Prohowui Zimiksho rahaira da khamatui china nathumwui ningli mapangapa kala makhanang ngasakalu. Hi ithumna khamaranli, hakashokli kala kakapili kahangna da mibingna kaphaning thai. Mi khipanakha nathumli khikhikhawui apong eina machipat ngasakalu. Kaja naomeikap kaji ngakaikashi atam kala meifali vaki kaje Makapha-Makhaya chi mashokrang lakha eina tangda zimiksho chi maramara. Ana, varena da kahobing kala khokharumwui otsak saikoral yetra kala a khalatta saikora chizwui tungli chipamkhuira. Varewui khorumshimli eina tangda vazanglaga Varena da kapamra. Nathum maphaningungmala? Saikora hi nathumli ngasopamlakha ina hangserhaira. Thalala aruichang chi mashok khavai kahapa akha lei kala chi khikhala da nathumna thei. Retkahai atam chili Makapha-Makhaya chi shokrasara. Matheikharara Makapha-Makhaya a chi ara ot saphokhaira, kha kahapapa china shongfa machikaranglakha eina tangdashokki kaji chi mashokfamara. Chizwui thili Makapha-Makhayapa chi khipakhala kaji phongshokra kha Proho Jishuna khara tharan awui khamor eina kashoka khaksuinaali suithathaora kala Prohowui kharawui kahan china ali shimanchao ngasakra. Makapha-Makhaya china Satanwui pangshap eina shokta mina masakharar, makhamashung kala matakha kahai ot kachungkha sachitheira, shimanki kaji athumli makapha-makhaya ot kachungkha eina minamra, athum shimanra, kaja kahui samphang khavai khamashung chi athumna makhuisangthu kala maleishithuwa. Chizwui vang eina khayonwui pangshap china ot sada makhamashung chi shitsang khavai Varena athumwui alungli khayonwui pangshap chi chihovai. Chizwui athei chiya khamashungli mashitkasang kha morei kasali ringkapha athum chili yonngasakra*” (2 Thessalonicanao 2:1-12).

Paulna Ephesusli khalei churchwui ararbingli khamatui chitharan ana hithada hanga, “*Mangla katharana nathumwui pangli horsangmi kahai yaonao saikorawuitunglila, kala nathum khalattawuitunglila ngasharalak eina mayonlu kala Anaomayarana thikhami kala phaphayakhami manga eina awui ngasangasak kahaia Varewui churchli homlu. Ina thei kaja I thuikahawui thili sakashi ramfabingna nathumwui ngachaili razangda khipalikha haisasa majilakmara. Kala nathumwui ngachawui eina mashongacheida khamatuia kaikha shokta shitikasangbingli athumwui athi shurkhavai sara. Chizwui vang eina ina kum kathum peichaoda ngashun gaya chara tada mi kachivali tamkachithe mathahailakmana kaji phaningungda nathum ningasharmeilu*” (Otsak 20:28-31).

Paulna kahang thada Khristawui thikashurabing kachungkhali thanthui kahai makapha-makhaya a chi churchwui ngachawui eina shoka. Okathuiwui

thotchanna church ngazankasang hi churchwui longnao kala shorkarli khangarar wuivangna da hanga. Prohowui ningkachangva local church kachiva kachichawui bishopbing kala deaconbing kapangsangda machihanngarokla kapam hina. Kha thalala, zingcum-atamna thuumamanda church ashangvana bishopbingwui ngachaili bishop akhali khangkada kateibingwui tungli chipamma, kala naoda ali local church kachungkhawui tungli akui sada mungkhavai mashun miya. Chithamamanda khanaowali ali okathui hupvali khalei local church saikorawui tungli mungkhavai kapangkada bishopbingwui ngachaili juimeikap kaji pamli chipama. Mah, hi thangngayakhawui lungli rakashok maningmana kha zingcum kasangkawui lungli rakashokna. Chithada 606 ADli juimeikap kaji pamli kapama bishop chili khamashungwui eina pakthuikahai churchbing, aja ithumna Catholic da theidakhalei church chiwui akui sanga-sakka kala ali Pope dala hoyu. Chitharan Prohowui churchli khi rashokhao khala? Prohona awui wungram kaja awui church katang mavaila leichingra da ngashit kahai athishurda mi machungmada okathuina matheirar salala shitkasang kathuka athumbingna khamashung chili nganingda rashumma.

Okathuiwui dharma shong eina yangakha Catholicna katongkhawui tungli mungsai. Hanglaxa chiakha china okathuili zingcum adam kasangkha munga, china mungkasa zingcum atambing chili tangkhamangwui thot (dark ages) dala theiya. Khiwui vang khala jila adam chitharan Pangmonbing (priests) mangna Bible hi palaga bhaptakashapna chieina athumna palaga mibingwui vang tamirano da michambingli Bible mapangasaksa mana. Sada khalei otsak chiwui kakhalat khikhala jila athumna mibingli theingasakkhanggaibingmang chi tammida khaleina.

Adam chitharanwui lungli rakahikli tara hikkharor (sprinkling) kala khokharumli khongkhavai akap-akai shikachin hkt. wui tamkachithei hina maram sada Catholic church eina tangdala khani sada Romenaobingwui aphan akha kala Greeknaobingwui aphan akha da kaingarokhaowa. Atamna thuumaman kajieina Catholic church, churchwui hangvanaobingwui (council) manga eina tamkachithei (doctrine) ngatateida ngarumsanga. Naolak eina kum thingkha-shaphanga atamli Catholic church hi tamkachithei lila kala acham-aramlila zakshisang haowa, chitharan Martin Luther kaho mi akha, pangmonla sakasa, ana church hi semkalui khavai kala mathasang ngasak khavai apong phaya. Kha thalala ali Catholic churchwui eina aming khuishokmi haowa, chithada a church chi naothahailaga awui kaphaning kala theikakhui athishurda khamashung chi sakhavai kala tamikhavai thuihaowa. Chiwui eina Shemkalui khavai Khangarar (reformation movement) hi kharana kala hithada khangarar wuivang eina aja ithumna theida khalei nga-

kaingarok laga khalei churchbing (Denominational churches) hi kashokna. Lutherna karkaphok pheikar china okathui apam kachivali khalei mibingli Bibleli hanungkhavai da hotkhanawui ningai hi leingasakka. Hiyakha hotna-salala hotkhana chi mapungphalak eina maungshungrarmana.

Kum Thingkha-shashini kala shachishat (1700 and 1800 AD) wui atamli Europe kala Americali denominational churchwui mipha akha ngasada khalei mi kaikha athumwui lungli kaingarokda khalei kala pangapa ngarokda khalei wuivang chotnahaowa. Ngaironda mathangmathang athumna leikasa khangui otsak chiwui eina Bibleli hanungmaman haowa. Athumwui ningkachang hi church kadhar akha haophokhalui maningmana kha Bibleli ithumna kapa samphang da khalei church chili hankhaung china. Athumna chili hanunga, kala chithanghonwui eina thuida Kadhara Tuingsahitwui Vareshi ngasaserkhavai khangakaokhon shaphoka, kala mi thingthingna mikumona semkakhui tamkachithe i hortahailaga ichamcham eina Vareshi kala Prohowui church member akha ngasakhavai hanung-ngarokser haowa kala Bible hi akhamang kaji athumwui thanme (guide) nada khuisinga.

Christianbing okathui apam kachivali khamashung pao hashokkazatli Africa, India, Russia, Poland kala apam khangatei kaikhalila reidawui eina leisaching kaji khamashunga Biblewui church kaikha samphanga (hibing hiva hankhaung bing maningla kha paokazatbingwui atamwuieina teolak salala mashimanda leisaching kaji bingna). Hi khamashunga Biblewui church lakka kachi chithe i khavai mikhavai (to prove) chiwui haophokhavai pam eina tangda yunkharawui darka maleimana. Churchwui ara/maong (pattern) kathada leikhala kaji Bibleli zanga, ithumna chi horzakda shurdaleiakha ithum hi Prohowui churchna. Varewui tui hi athana (Luke 8:11). Khareili paokazatbingna atha chi khayao eina Christianbing kala Khristawui church memberbing shoka, ajala ngaraikacha atha kaja Varewui tui chi yaoakha ngaraikacha arong chi kharshokra. Prohowui wungram chi katangmavaila leichingra kaji chi ithumna thei. Chithada sada chi haophokthang eina thuida aja rashung chi leichingdalei, kala naodala leichingra katang mavaila, kala chi sashiman khavai pangshap mikumowuilila kala chipeewuilila maleimana. Hi Prohowui wungramna kala awui churchna, haokaphokwui eina thuida akatang eina tangda khayuiya chi china, khanaowali china katangmavaila Proholi ngasoda panra.

Khangahan Bing

Mashungda ngahankalu:

1. Khi Biblewui lairikli Church haokaphokwui kharachan samphang khala?
2. Church hi khi keinungli haophok khala?

3. Sakkha shili churchli mangla kayakha ngarumsang khala?
4. Khi apam mameili paokapha hashoksa khala?
5. Paulna kayakhashida pao hakashok shongja ngakhuikhala?
6. Paul Jihudinaobing wuivangmang paokapha hashok mila?
7. Paulwui ot manga eina church kashok yur (continent) khani chi khikhala?
8. Sakhangathabing ngaphayang kahai chitharan athum khi sakhala?
9. Khipana churchli rekkakharek mikhala?
10. Paokazatbing kayakhali athumwui shitkasangwui kathi shongran mikhala?
11. Church mahaksang mamankhala rekkakharek milala?
12. Churchli naoda khi rashokrada da Paulna hangmaran khala?
13. Makaphana churchli kathada ngararphok (attack saphok khala) khala?
14. AD 606li khi rashok khala?
15. Prohowui churchli khi rashokhao khala?
16. Khiwuivang zingkum atam kasangkhalali tankamang thot da hokhala?
17. Catholic church khani sada kaishok kahai aphanh khani chi khi hokhala?
18. Roman Catholic church shemkalui khavai hotnakasaya mi chi khi pa khala?
19. Ana chi khiwuivang hotkhana khala?
20. Ana chi hotkhana wuivang china khi movement khuirami khala?
21. Athum Bibleli mapungphalak eina hanung chaola?
22. Zingkum thingkha shashini-shachishat wui atamli khi rashok khala?
23. Bibleli hanungda Prohowui churchwui ara/maong horzakda sakhavai athumna church kadhar akha haophokla?
24. Okathui apam kateili Christianbingna Biblewui horzak kahai church samphanhla?
25. Khristawui kamashunga church ajala leichingdaleila?

KATAM THARADA-KATHUM AJAWUI CHURCH

Prohowui church sakada zingcum thing-khani kananai haira, kha ajala Prohowui church kharewui chithada leichinga, mangacheimana. “Hi katha-da sapai chikhala?” da nana phaningsalapai. Kha Kadhara Tuingashit lairik-li mikahai churchwui ara/maong (pattern), kaja churchwui sakrin hithaki kaja da hangmikahai chi horzakda kashurwui vangna.

Mi kaikhana phananga kaja aja leida khalei church hi ngaraikacha Prohona sakamihai kasa church chi hilakga da chithei khavai (prove sakhavai) thuikahai zingcum atambing yunramaman da church haokaphok Pentecost zimiksho eina tangda yunki kajina da. Kha thalala, chi khamashung maningmana. Khareyali, Prohona hithada hangkahai leiya, kaja Awui wungram kaja church hi katang mavaila mashimanda leichingra da (Daniel 2:44; Luke 1:33; Hebrewnao 12:28). China Church hi haophokthangwui eina thuida aja rashungda okathui apam akhali leirashumma kaji chitheiya. Prohona hangkahai tui chiwui athishurda church hi okathui apam kachivali kala atam kachidali leichingra kaji maning mana. Mathangli, ithumwui pangli wungramwui atha (Luke 8:11) mashimanngasakhaila Kadhara Tuingshitwui lungli leichingdalei. Paokazatbingwui atamli atha china Vareshi shokngasakakha ajala ngaraikacha atha china Vareshi shokngasakra. Atam chitharanwui Vareshibing eina church shemkaakha ajala chipapamra. Chiwuiwang eina Kadhara Tuingashit leikhavai pam kachidali Prohowui church shokngasakpai chi khaleibingna chiwui kahang athishurda saakha. Varena thotkachidali awui miyurbingli ali kathada shurrakhala kaji ara/maong (pattern) chitheimiya. Ana Noahli Marikhong kathada sarakhala kaji chitheimiya (Haokaphok 6). Ana Moseswui vangla Kachonshim (Tabernacle) hithada salu kaji athishurda ngasharлак eina sakhavai hangchitheiya, “*Athumna kasa hiya kazingramli sada khalei ot chiwui akala katha shakakhuina. Hi Mosesna sakasa chieina takamhai. Ana Tabernacle sauki kaji tharan Varena ali hanga, Kaphungtungli hangkahai chi takam eina mangapeilakla salu*” (Hebrewnao 8:5). Chi takam eina Kadhara Tuingashitli Prohowui church kathada sakara khala kajiwui pongli khalakhuida kathei samphang haira. Varena Noah eina Mosesli ana hangkahai chiwui athishurda horzakda shurkhavai kachihan thada aja ithumla ana churchwui pongli kathada salu jikhala chiwui athishurda saphalungra. Varena Noah eina Mosesli marikhong kala Tabernacle kathada salu da hangkhala chiwui athishurda anina kasa wuiwang Vare aniwui tungli ningyangunglakka, chi takam eina aja ithumla Varena churchwui pongli hangkahai chiwui thishurda saakha

ithumwui tunglila awui ningyang khaung leira, kala Churchla ana ngasanga-sak khangai, awui ningli hitharano da machukkahai takam eina leira, matai-kasangla kala suikatala maleimara (Phongkhami 22:18,19).

Church machutkhavai machutbing saikora tharzari eina Kadhara Tui-ngashit lairikli chitheimihaidalei. Prohona church hi khipana sakakhala, kali sakakhala, katharan haophok khala, khi aming eina hokhala, chiwui memberbingli khi aming eina hokhala, chiwui member ngasakhavai khi sara, kathada khorum khala, kala chiwui otngarut khikhala kaji hangmiya. Kala churchwui akuia chi khipakhala, chi khi eina lokhui khala, kala chiwui hui-khame chi khipakhala kaji hkt. hila hangmiya. Church khikhala kala chiwui otngarut khikhala kajiwui pongli pakhangapa kala ningkhamong lei khavai kaa mahaimi mana. Varena churchwui pongli hithaya da chitheimikahai chi Awui tuiwui kasheng thada shenga.

Chithada sada ithumwui sakhangayi otbing chiya Bible palaga khamachuk china, chithada kasa eina akhamang kaji khamashunga Biblewui church chi ithumna theikhuipaira. Chiwui pongli khamashung theikhuida chi kashur chitharan ithum chiwui member ngasakahaina kala chi Prohona sakakahai ngaraikacha church china. Thingtheibingwui atha ithumna khayao tharan kachicha thingrong ayur athishurda kharkashok thada Varewui tuina Vareshi kala Prohowui church member shokngasakga thuikahai atamli kashok thada.

Khristawui church hi okathuiwui apam kachivali samphangpai. Chiya hili kala apam kachivali lei. Mikumo hi Biblena kahang sasi kaja church apam kachivali atam kachida leipai. Okathui kachikatha apam akhali khalei mibing-na Varewui kaphaning kasa ngasamhaiakha chiwui churchla shimanhaora.

Aja Khristawui church haksangmaman da mayasang dalei khiwuivang khala jila china Biblewui tuimangli kashur wuivangna. China kaikhangarok mamayamana kala Khristali khangmasotmiya. Chi Bibleli kapa samkaphang akhamang kaji church china. Chi denomination maningmana lah denomination bing khangarumwui churchla maning mana. Chi Catholic maningmana kala Catholicli mamayamada kaishok kahaibingla maningmana lah awo-ayi wui eina khuirami khamaron ngashanwui eina khara dharma chila maningmana. Thakha chi khikhala? Theipailakga kaja chi Prohowui churchna. Chi manei, chili langda hangkhavai katei maleilui mana.

Prohowui church okathuili chiwui akuia malei mana kala akuia pamkhavai shimla maleimana. China mikumoli khayashida mamasotmi mana. Phasarinwui thangmet-awor eina sakakhui longnao maleimana. Local church kachiva kachicha khalatta ararbing, deaconbing, paohakashoka, tamkhamiya, kala chiwui memberbing ngarumda khalatawui otsak-khangarum

leiya, athum machihan ngarok mana, kala local church akhana akhawui azingli maleila kachichawui ningkhan eina panna. Churchwui lungli kathem-thangkhamei makhaimana, chiwuiwang eina churchwui lungli mi akhali akhawui tungli khangkada masotkhami hikathatha hi malei mana.

Haokaphokwui eina thuida Khristawui church awui yangkashe leichinga, yangkashe chi ajala leichingdalei. Mikumowui dharmarinwui longnao china Khristawui churchli yetta, khiwuiwang khala jila athumwui kasakhava otsak chili Khristawui churchna mashurmana, athumwui kasakhava kala otsak athishurda makashurabingwui tungli athumwui maringkapha leiya. Athumli ngarumsak makhalei kala athumli sokhamiwui shalamtui mahangkhami churchli athumwui maringkapha lei. Athum mikumowui tamkachitheili shurdaleilakha hishong Biblemangli horzakda kashura mi kaikha leiya kachi hila athumna ngasharlak eina theiya. Biblewui church hiya Khristamangli shurra kala Khristawui aming sari thada ngavaiya kaji athumna theiya kha athumva mikumoli shurra kala mikumowui aming sari thada ngavaiya. Athumna Khristawui churchli khayet tharan khutlai sada shikachin chiya khamashunga chi maningla kha kakapik-kakhayang kala khamarao tui; kala nguida hangkhami/chitheikhami hkt. hina. Kha athumna chotkhai saikora aremana.

Prohowui church hiya khayuiya sada mithot kachungkha kanthuihaira. Okathuili awui yangkashebing kala kazeiramwui makapha chepee china ali makhamrarmana. Mi mashing eina khangaeo tharan awui mibing teolak-salapai, kha kahui samkaphang mi teolakga da kapihai phalunga (Matthew 7:13,14). Khrista, awui church akhamang leiya, akhamang kaji awui church chiwuiwang a thangkha okathuili latraluira (Ephesianao 5:27; John 14:1-6). Khrista hi awui wungramwui awungana, kala thangkha awui wungram chi Varewui pangli mikakhavai okathuili rara (1 Corinthnao 15:24). Khrista awui makhamkahaiva akhamang leiya (Phongkhami 21:9) kala awui aming sari thada khangavaiva, awui makhamkahaivali khuikhavai rara. Church khangatei bingwui pongli katharakhala? Athumli Khristana hithada hangra kaja ana athumli matheimana lah katheila matheisa manada. Ana athumli phurshokhaora (Matthew 15:13). Athumli kazipkhui laga meili horsanghaora.

Kashenga Kadhara Tuingashit wui Vareshi sakhavai sasa kaji hi ithumwui seihana. Varewui tui chili hanunglu kala chi napheiwui kahor sangasaklu. Bible theilu, chithaakha khamashung khikhala da nana theira. China khi hangkhala chi salu chieina nali huimira kala Bibleli kapa samkaphang akhamang kaji Prohowui churchli ngarumsangmira.

Na Khristawui churchwui member mangasarangakha, ngasakhavai katomidalei. Vareli shitsanglu, moreiwui eina ningngateihaolu, Khrista hi

Varewui naomayarana da hangphatlu, kala rahikhaolu chieina nali huimira (Mark 16:15, 16; Romenao 10:10; Otsak 2:38). Chithada kasa eina nali Khristana awui churchli ngarumsangmira kala na Christian ngasahaora (Otsak 2:47; 11:26). Na chi Sarala? Khipanakha nali danti masamara, kha ithumna shitsanga kaja nana Bible mathalak eina pada machuksi kaja na Christian sangaira, chithada nawui mirin Khristawui vang kharanga mirin ngasakhavai kala awui wungramwui thari mayasang ngasak khavai hotkhana mirin ngasathui haora.

Khangahan Bing

Mashungda ngahankalu:

1. Church katharan haophok khala?
2. Church chi ajala leichingdaleila?
3. Kachikatha mi akhana hi Prohowui churchna da chithei khavai zingkum shasha makanda yun khaung darka sala?
4. Prohona awui wungram atam kayakha sangda nganingra da hangkhala?
5. Wungramwui atha chi khikhala?
6. Aja atha chi yaosangakha khi kharshokra khala?
7. Varena Noah eina Moses khi chitheimi khala?
8. Prohowui churchwui ara (maong) kali samphangpaira khala?
9. Prohowui church machut khavai machutbing kali leikhala?
10. Prohona ithumli Churchwui pongli khi hangmi khala?
11. Akhamang kaji Biblewui khamashunga church chi ithumna kathada theipair khala?
12. Aja Khristawui church khi apamameili samphangpaira khala?
13. Church chi denomination la?
14. Church chi okathuili chiwui akuia kala a pamkhavai maleikhala?
15. Churchwui yangkashe bing chi khipalong khala?
16. Athumwui khutlai chi khikhala?
17. Church hi mithod kachidali khayuiya ngasada rashumla?
18. Khi wuivang Khrista latraki kaji khala?
19. Ithumwui seiha khikhala?
20. Mi akhana Christian ngasakhavai khuikhangayiya pheikar bing chi khi-mamei khala hanglu

Khamashung maningakha khanguipali circle salu:

1. Khristana sakaka church ajala leichingdalei. (mashunga/nguiya).
2. Church akhamanga. (mashunga/nguiya).
3. Church hi Khristawui ming sari thada ngavaiya. (mashunga/nguiya).
4. Kahui samphang khavai chiwui member ngasaphalungra. (mashunga/nguiya).
5. Khrista thangkha okathuili awui church khuikhavai latraluira. (mashunga/nguiya).